

摘藻堂四庫全書薈要

史部

欽定四庫全書薈要卷六千六百五十七 史部

明史卷六十四

大學士張廷玉等奉 勅修

志第四十

儀衛

周官王之儀衛分掌於天官春官夏官之屬而蹕事則  
專屬於秋官漢朝會則衛官陳車騎張旗幟唐沿隋制  
置衛尉卿掌儀仗帳幕之事宋衛尉領左右金吾衛司

左右金吾仗司六軍儀仗司主清道徼巡排列奉引儀仗  
元置拱衛司領控鶴戶以供其事歷代制度雖有沿革  
異同總以謹出入之防嚴尊卑之分慎重則尊嚴尊嚴  
則整肅是故文謂之儀武謂之衛天子出車駕次第謂之  
鹵簿而唐制四品以上皆給鹵簿則君臣並得通稱也  
明初詔禮官鹵簿彌文務從省節以示尚質去奢之意  
凡正至聖節朝會及冊拜接見蕃臣儀鸞司陳設儀仗而  
中宮東宮親王皆有儀仗之制後或隨時增飾要以洪

武創制為準則焉茲撮集禮所載太凡以備考核其郡  
王及皇妃東宮妃以下儀仗載在會典者並著於篇云  
皇帝儀仗吳元年十二月辛酉中書左相國李善長率  
禮官以即位禮儀進是日清晨拱衛司陳設鹵簿列甲  
士於午門外之東西列旗仗於奉天門外之東西龍旗  
十二分左右用甲士十二人北斗旗一纛一居前豹尾  
一居後俱用甲士三人虎豹各二馴象六分左右布旗  
六十四門旗日旗月旗青龍白虎風雲雷雨江河淮濟

旗天馬天祿白澤朱雀元武等旗木火土金水五星旗  
五嶽旗熊旗鸞旗及二十八宿旗各六行每旗用甲士  
五人一人執旗四人執弓弩設五輅於奉天門外玉輅  
居中左金輅次革輅右象輅次木輅俱並列丹墀左右  
布黃麾仗黃蓋華蓋曲蓋紫方纈紅方纈雉扇朱團扇  
羽葆幢豹尾龍頭竿信幡傳教幡告止幡絳引幡戟斨  
戈斨儀鍠斨等各三行丹陛左右陳幢節響節金節燭  
籠青龍白虎幢班劔吾杖立瓜卧瓜儀刀鐙杖戟骨朵

朱雀元武幢等各三行殿門左右設圓蓋一金交椅金  
脚踏水盆水罐團黃扇紅扇皆校尉擎執洪武元年十  
月定元旦朝賀儀金吾衛於奉天門外分設旗幟宿衛  
於午門外分設兵仗衛尉寺於奉天殿門及丹陛丹墀  
設黃麾仗內使監擎執於殿上凡遇冬至聖節冊拜親  
王及蕃使來朝儀俱同其宣詔赦降香則惟設奉天殿  
門及丹陛儀仗殿上擎執云其陳布次第午門外刀盾  
及叉各置於東西甲士用赤奉天門外中道金吾宿衛

二衛設龍旗十二分左右用青甲士十二人北斗旗一  
轟一居前豹尾一居後俱用黑甲士三人虎豹各二馴  
象六分左右左右布旗六十四左前第一行門旗二每  
旗用紅甲士五人內一人執旗旗下四人執弓箭第二  
行月旗一用白甲士五人內一人執旗旗下四人執弩  
青龍旗一用青甲士五人內一人執旗旗下四人執弩  
第三行風雲雷雨旗各一每旗用黑甲士五人內一人  
執旗旗下四人執弓箭天馬白澤朱雀旗各一每旗用

紅甲士五人內一人執旗旗下四人執弓箭第四行木

火土金水五星旗各一隨其方色每旗用甲士五人內

一人執旗旗下四人執弩其甲木青火紅土黃金白水

黑熊旗鸞旗各一每旗用紅甲士五人內一人執旗旗

下四人執弩第五行角亢氐房心尾箕旗各一每旗用

青甲士五人內一人執旗旗下四人執弓箭第六行斗

牛女虛危室壁旗各一每旗用青甲士五人內一人執

旗旗下四人執弩右前第一行門旗二每旗用紅甲士



五人內一人執旗旗下四人執弓箭第二行日旗一用  
紅甲士五人內一人執旗旗下四人執弩白虎旗一用  
白甲士五人內一人執旗旗下四人執弩第三行江河  
淮濟旗各一隨其方色每旗用甲士五人內一人執旗  
旗下四人執弓箭其甲江紅河白淮青濟黑天祿白澤  
元武旗各一每旗用甲士五人內一人執旗旗下四人  
執弓箭天祿白澤紅甲元武黑甲第四行東南中西北  
五嶽旗各一隨其方色每旗用甲士五人內一人執旗

旗下四人執弩其甲東嶽青南嶽紅中嶽黃西嶽白北嶽黑熊旗麟旗各一每旗用紅甲士五人內一人執旗旗下四人執弩第五行奎婁胃昴畢觜參旗各一每旗用青甲士五人內一人執旗旗下四人執弓箭第六行井鬼柳星張翼軫旗各一每旗用青甲士五人內一人執旗旗下四人執弩奉天門外拱衛司設五輅玉輅居中左金輅次革輅右象輅次木輅俱並列典牧所設乘馬於文武樓之南各三東西相向丹墀左右布黃麾仗

凡九十分左右各三行左前第一行十五黃蓋一紅大  
繖二華蓋一曲蓋一紫方繖一紅方繖一雉扇四朱團  
扇四第二行十五羽葆幢二豹尾二龍頭竿二信幡二  
傳教幡二告止幡二絳引幡二黃麾一第三行十五戟  
髦五戈髦五儀鍠髦五右前第一行十五黃蓋一紅大  
繖二華蓋一曲蓋一紫方繖一紅方繖一雉扇四朱團  
扇四第二行十五羽葆幢二豹尾二龍頭竿二信幡二  
傳教幡二告止幡二絳引幡二黃麾一第三行十五戟

斃五戈斃五儀鎧斃五皆校尉擎執丹陛左右拱衛司  
陳幢節等仗九十分左右為四行左前第一行響節十  
二金節三燭籠三第二行青龍幢一班劔三吾仗三立  
瓜三卧瓜三儀刀三鐙杖三戟三骨朶三朱雀幢一右  
前第一行響節十二金節三燭籠三第二行白虎幢一  
班劔三吾杖三立瓜三卧瓜三儀刀三鐙杖三戟三骨  
朶三元武幢一皆校尉擎執奉天殿門左右拱衛司陳  
設左行圓蓋一金腳踏一金水盆一團黃扇三紅扇三

右行圓蓋一金交椅一金水罐一團黃扇三紅扇三皆  
校尉擎執殿上左右內使監陳設左拂子二金唾壺一  
金香合一右拂子二金唾盂一金香爐一皆內使擎執  
和聲郎陳樂於丹墀文武官拜位之南其器數詳見樂  
志內三年命製郊丘祭祀拜褥郊丘用席表蒲裏為褥  
宗廟社稷先農山川用紅文綺表紅本棉布裏為褥十  
二年命禮部增設丹墀儀仗黃繖華蓋曲蓋紫方繖紅  
方繖各二雉扇紅團扇各四羽葆幢龍頭竿絳引傳教

告止信幡各六戟斃戈斃鎗斃各十永樂元年禮部言  
鹵簿中宜有九龍車一乘請置增帝曰禮貴得中過為  
奢不及為儉先朝審之精矣當遵用舊章豈可輒有增  
益以啟後世之奢哉九龍車既先朝所無其仍舊便宜  
德元年更造鹵簿儀仗有具服幄殿一座金交椅一金  
脚踏一金盆一金罐一金馬杓一鞍籠一金香爐一金  
香合一金唾盂一金唾壺一御杖二擺錫明甲一百副  
盔一百弓一百箭三千刀一百其執事校尉每人鵝帽

只孫衣銅帶鞞履鞋一副常朝各色羅掌扇四十各色  
羅絹繖十萬壽繖一黃雙龍扇二筵宴銷金羅繖四銷  
金雨繖四金龍響節二十四

皇后儀仗洪武元年定丹陛儀仗三十六人黃麾二戟  
五色繡旗六戈五色繡旗六鎗五色錦旗六小雉扇四  
紅雜花團扇四錦曲蓋二紫方繖二紅大繖四丹墀儀  
仗五十八人班劍四吾杖五立瓜四卧瓜四四儀刀四  
鐙杖四骨朶四斧四響節十二錦花蓋二金交椅一金

脚踏一金水盆一金水罐一方扇八宮中常用儀衛二十人內使八人色繡襜二金斧二金骨朶二金交椅一金脚踏一宮女十二人金水盆一金水罐一金香爐一金香合一金唾壺一金唾盂一拂子二方扇四永樂元年增製紅杖一對

太皇太后皇太后儀仗與皇后同

皇太子儀仗洪武元年定門外中道設龍旗六其執龍旗者並戎服黃旗一居中左前青旗一右前赤旗一左



後黑旗一右後白旗一每旗執弓弩軍士六人服各隨  
旗色殿下設三十六人絳引旛二戟麾六戈麾六鎗麾  
六羽葆幢六青方纛二青小方扇四青雜花團扇四皆  
校尉擎執殿前設四十八人班劍四吾杖四立瓜四卧  
瓜四儀刀四鐙杖四骨朶四斧四響節十二金節四皆  
校尉擎執殿門設十二人金交椅一金腳踏一金水罐  
一金水盆一青羅團扇六紅圓蓋二皆校尉擎執殿上  
設六人金香爐一香合一唾盃三唾壺一拂子二皆內

使擎執永樂二年禮部言東宮儀仗有司失紀載視親  
王差少宜增製金香爐金香合各一及二义二傳教告  
止信幡各二節二幢二夾稍二稍刀盾各二十戟八紅  
紙油燈籠六紅羅銷金邊圓繖紅羅繡圓繖各一紅羅  
曲蓋繡緞紅羅素圓繖紅羅素方繖青羅素方繖各二  
紅羅繡孔雀方扇紅羅繡四季花團扇各四拂子二唾  
盂唾壺各一鞍籠一誕馬八紅令旗二清道旗四幟弩  
一白澤旗二弓箭二十副從之

親王儀仗洪武六年定宮門外設方色旗二青色白澤  
旗二執人服隨旗色並戎服殿下絳引旛二戟斃二戈  
斃二鍠斃二皆校尉執殿前班劔二吾杖二立瓜二卧  
瓜二儀刀二鐙杖二骨朶二斧二響節八皆校尉執殿  
門交椅一脚踏一水罐一水盆一團扇四蓋二皆校尉  
執殿上拂子二香爐一香合一唾壺一唾盂一十六年  
詔親王儀仗內交椅盆罐用銀者悉改用金建文四年  
禮部言親王儀仗合增紅油絹銷金兩繖一紅紗燈籠

紅油紙燈籠各四  
魷燈二大小銅角四  
從之永樂三年  
命工部親王儀仗  
內紅銷金繖仍用  
寶珠龍文凡世子  
儀仗同

郡王儀仗令旗二  
清道旗二幟弩一  
刀盾十六弓箭十  
八副絳引傳教告  
止信幡各二吾杖  
儀刀立瓜卧瓜骨  
朶斧各二戟十六  
稍十六麾一幢一  
節一響節六紅銷  
金圓繖一紅圓繖  
一紅曲柄繖二紅  
方繖二青圓扇四  
紅圓扇四誕馬四  
鞍籠一馬杌一拂  
子二交椅一脚踏

一水盆一水罐一香爐一紅紗燈籠二魷燈二帳房一  
座

皇妃儀仗紅杖二清道旗二絳引幡二戈斃戟斃儀鎗  
斃吾杖儀刀班劍立瓜卧瓜鐙杖骨朶金鉞各二響節  
四青方繖四紅繡圓繖一繡方扇四紅花圓扇四青繡  
圓扇四交椅一脚踏一拂子二水盆一水罐一香爐一  
香合一唾盂一唾壺一紅紗燈籠四

東宮妃儀仗紅杖二清道旗二絳引幡二儀鎗斃戈斃

戟斃吾仗儀刀班劔立瓜卧瓜鐙杖骨朶金錢各二響  
節四青方繖二紅素圓繖二紅繡圓繖一紅繡方扇四  
紅繡花圓扇四青繡圓扇四交椅一脚踏一拂子二水  
盆一水罐一香爐一香合一紅紗燈籠四永樂二年禮  
部言東宮妃儀仗如親王妃惟香爐香合如中宮但亦  
不用金其水盆水罐皆用銀從之

親王妃儀仗紅杖二清道旗二絳引樞二戟斃吾杖儀  
刀班劔立瓜卧瓜骨朶鐙杖各二響節四青方繖二紅

綵畫雲鳳繖一青孔雀圓繖四紅花扇四交椅一脚踏  
一水盆一水罐一紅紗燈籠四拂子二公主世子妃儀  
仗俱同

郡王妃儀仗紅仗二清道旗二絳引幡二戟髦吾杖班  
劍立瓜骨朶各二響節二青方繖二紅圓繖一青圓扇  
二紅圓扇二交椅一脚踏一拂子二紅紗燈籠二水盆  
一水罐一

郡主儀仗紅杖二清道旗二班劍吾杖立瓜骨朶各二

響節二青方繖一紅圓繖一青圓扇二紅圓扇二交椅  
一脚踏一水盆一水罐一紅紗燈籠二拂子二舊例郡  
王儀仗有交椅馬杌皆木質銀裹水盆水罐及香爐香  
合皆銀質抹金量折銀三百二十兩郡王妃儀仗有交  
椅等大器量折銀一百六十兩餘皆自備充用嘉靖四  
十四年定除親王及親王妃初封儀仗照例頒給外其  
初封郡王及郡王妃折銀等項併停止萬歷十年定郡  
王初封係帝孫者儀仗照例全給係王孫者免蓋宗室



分封漸多勢難徧給也

明史卷六十四

欽定四庫全書薈要卷六千六百五十八史部

明史卷六十五

大學士張廷玉等奉 敕修

志第四十一

輿服一

大小馬輦

大輅玉輅

步輦大涼步輦

板輶

耕根車

后妃車輿

皇太子親王以下車輿

公卿以下車輿

織蓋

鞍轡

有虞氏御天下車服以庸夏則黻冕致美商則大輅示  
儉成周有巾車典輅弁師司服之職天子以之表式萬  
邦而服車五乘下逮臣民漢承秦制御金根為乘輿服  
衮元以承大祀東都乃有九旒雲罕旒冕絢屨之儀物  
踵事增華日新代異江左偏安玉輅棲寶鳳采旒銜金  
龍其服冕也或飾翡翠珊瑚雜珠豈古所謂法駕法服  
者哉唐武德間著車輿衣服之制上得兼下下不得擬

上宋初袞冕不綴珠玉政和中詔修車輅並建旂常議  
禮局所釐定用為成憲元制郊祀則駕玉輅服袞冕巡  
幸或乘象輜四時質孫之服各隨其宜明太祖甫有天  
下考定邦禮車服尚質酌古通今合乎禮意迄於世宗  
耜田造耕根燕居服燕弁講武用武弁更為忠靖冠以  
風有位為保和冠以親宗藩亦一王之制也若夫前代  
織扇鞞勒之儀門戟旌節之屬咸別等威至宋加密明  
初儉德開基宮殿落成不用文石甃地以此坊民武臣

猶有飾金龍於牀幔馬廐用九五間數而豪民亦或鎔  
金為酒器飾以玉珠太祖皆重懲其弊乃命儒臣稽古  
講禮定官民服舍器用制度歷代守之遞有禁例茲更  
以朝家冊寶中外符信及宮室器用之等差附叙於後  
焉

天子車輅明初大朝會則拱衛司設五輅於奉天門玉  
居中左金次革右象次木駕出則乘玉輅後有腰輿以  
八人載之其後太祖考周禮五輅以詢儒臣曰玉輅太

侈何若祇用木輅博士詹同對曰孔子云乘殷之輅即木輅也太祖曰以玉飾車古惟祀天用之常乘宜用殷輅然祀天之際玉輅未備木輅亦未為不可參政張昶曰木輅戎輅也不可以祀天太祖曰孔子斟酌四代禮樂以為萬世法木輅寧不可祀祀在誠敬豈泥儀文洪武元年有司奏乘輿服御應以金飾詔用銅有司言費小不足惜太祖曰朕當有四海豈恠乎此第儉約非身先無以率下且奢泰之習未有不由小而至大者也六

年命禮官考五輅制為木輅二乘一以丹漆祭祀用之

一以皮鞮行幸用之是冬大輅成命更造大輅一象輅

十中宮輅一後宮車十飾俱以鳳以將幸中立府故造

之非常制也二十六年始定鹵簿大駕之制玉輅一大

輅一九龍車一步輦一後罷九龍車永樂三年更定鹵

簿大駕有大輅玉輅大馬輦小馬輦步輦大涼步輦板

輅各一具服幄殿各一

大輅高一丈三尺九寸五分廣八尺二寸五分輅座高

四尺一寸有奇上平盤前後車樞並雁翅及四垂如意  
滴珠板轆長二丈二尺九寸有奇紅髹鍍金銅龍頭龍  
尾龍鱗葉片裝釘平盤下方箱四周紅髹匡俱十二楬  
內飾綠地描金繪獸六麟狻猊犀象天馬天祿禽六鸞  
鳳孔雀朱雀翟鶴盤左右下有護泥板及車輪二貫軸  
一每輪輻十有八其輞皆紅髹抹金銅鍍花葉片裝釘  
輪內車心用抹金銅鍍蓮花瓣輪盤裝釘軸中纏黃絨  
駕轆諸索輅亭高六尺七寸九分四柱長五尺八寸四



分檻座皆紅髹前二柱鍍金柱首寶相花中雲龍文下

龜文錦前左右有門高五尺一寸九分廣二尺四寸九

分四周裝雕木沉香色描金香草板十二片門旁榻各

二及門枕俱紅髹以抹金銅鈸花葉片裝釘榻編以黃

線條後紅髹屏風上雕描金雲龍五紅髹板戲金雲龍

一屏後地沉香色上四榻雕描金雲龍四其次雲板如

之下三榻雕描金雲龍三其次雲板亦如之俱抹金銅

鈸花葉片裝釘亭內黃線條編紅髹匡軟座下蓮花墜

石上施花毯紅錦褥席紅髹坐椅靠背上雕描金雲龍

一下雕雲板一紅髹福壽板一并褥椅中黃織金椅靠

坐褥四圍椅裙施黃綺帷幔亭外青綺緣邊紅簾十扇

輅頂并圓盤高三尺有奇鍍金銅蹲龍頂帶仰覆蓮座

垂攀頂黃線圓條盤上以紅髹其下外四面地沉香色

描金雲內四角地青繪五彩雲以青飾輅蓋亭內貼金

斗拱承紅髹匡寶蓋闌以八頂冒以黃綺謂之黃屋中

并四周繡五彩雲龍九天輪三層皆紅髹上安雕木貼

金邊耀葉板八十一片內綠地雕木貼金雲龍文三層  
間繪五彩雲觀板八十一片盤下四周黃銅釘裝施黃  
綺瀝水三層每層八十一摺間繡五彩雲龍文四角垂  
青綺絡帶各繡五彩雲升龍圓盤四角連轆坐板用攀  
頂黃線圓條并貼金木魚轆亭前有左右轉角闌干二  
扇後一字帶左右轉角闌干一扇皆紅髹內嵌雕木貼  
金龍間以五彩雲三扇共十二柱柱首雕木貼金蹲龍  
及線金五彩蓮花抱柱闌干內四周布花毯亭後樹太

常旂二以黃線羅為之皆十有二旂每旂內外繡升龍  
一左旂腰繡日月北斗竿首用鍍金銅龍首右旂腰繡  
黻字竿首用鍍金銅戟各綴抹金銅鈴二垂紅纓十二  
纓上施抹金銅寶蓋下垂青線帔踏梯一紅毳以抹  
金銅釵花葉片裝釘行馬架二紅毳上有黃絨匾條用  
抹金銅葉片裝釘有黃絹幪衣即遮塵油絹雨衣青氈衣  
及紅油合扇梯紅油托叉各一輅以二象駕之

玉輅亦駕以二象制如大輅而無平盤下十二榻之飾

輅亭前二柱飾以搏換貼金升龍屏風後無上四楬雲龍及雲板之飾天輪內用青地雕木飾玉色雲龍文而太常旗及踏梯行馬之類悉與大輅同

大馬輦古者輦以人輓之周禮巾車后五輅其一輦車組輓然縣師有車輦之稽忝苗詩云戎任戎輦則臣民所乘亦名輦至秦始皇去其輪而制乃尊明諸輦有輪者駕以馬以別於步輦馬其制高一丈二尺五寸九分廣八尺九寸五分轅長二丈五寸有奇輦座高三尺四寸

有奇餘同大輅輦亭高六尺四寸有奇紅髹四柱長五尺四寸有奇檻座高與輅同四周紅髹條環板前左右有門高五尺有奇廣二尺四寸有奇門旁榻各二後榻三及明杌皆紅髹抹金銅釵花葉片裝釘榻心編以黃線條亭內制與大輅同第軟座上不用花毯而用紅毯亭外用紅簾十二扇輦頂并圓盤高二尺六寸有奇上下俱紅髹以青飾輦蓋其銅龍蓮座寶蓋黃屋及天輪輦亭制悉與大輅同太常旗踏梯行馬之屬亦同大輅

駕以八馬備鞍韉鞞轡鈴纓之飾

小馬輦視大馬輦高廣皆減一尺轅長一丈九尺有奇  
餘同大馬輦輦亭高五尺五寸有奇紅髹四柱長五尺  
四寸有奇檻座紅髹四周條環板前左右有門高五尺  
廣二尺五寸有奇門旁榻各二及明杖後屏風壁板俱  
紅髹用抹金銅鈸花葉片裝釘亭底紅髹上施紅花毯  
紅錦褥席外用紅簾四扇駕以四馬餘同大馬輦  
步輦者古之步輓明制高一丈二尺二寸有奇廣八尺

二寸有奇輦座高三尺二寸有奇四周雕木五彩雲渾  
貼金龍板十二片間以渾貼金仰覆蓮座下雕木線金  
五彩雲板十二片輓四紅髹中二輓長三丈五尺九寸  
左右二輓長二丈九尺五寸有奇俱以鍍金銅龍頭龍  
尾裝釘輦亭高六尺三寸有奇四柱長六尺二寸有奇  
檻座紅髹四周雕木沉香色描金香草板十二片抹金  
銅釵花葉片裝釘前左右有門高五尺七寸有奇廣二  
尺四寸有奇門旁紅髹十字榻各二扇雕飾沉香色描



金雲龍板八片下雲板如其數後紅髹屏風上雕沉香色描金雲龍五屏後雕沉香色描金雲龍板三片又雲板如其數俱用抹金銅釵花葉片裝釘餘同馬輦惟紅簾用十扇輦頂并圓盤高二尺六寸有奇其蓮座輦蓋天輪幃衣之屬俱同馬輦

大涼步輦高一丈二尺五寸有奇廣一丈二尺五寸有奇四面紅髹匡裝雕木五彩雲板二十片間以貼金仰覆蓮座下紅髹如意條環板如其數紅髹轅六中二轅

長四丈三尺五寸有奇左右二轅長四丈有奇外二轅  
長三丈六尺五寸有奇前後俱飾以雕木貼金龍頭龍  
尾輦亭高六尺五寸有奇廣八尺五寸有奇四柱紅髹  
前左右有門高五尺八寸有奇廣二尺五寸有奇四周  
描金香草板十二片門旁榻各二後榻三及明杖皆紅  
髹編以黃線條亭底上施墊氈加紅錦褥并席紅髹坐  
椅一四周雕木沉香色描金寶相花靠背褥裙帷幔與  
馬輦同內設紅髹卓二紅髹闌干香卓一闌干四柱首

俱雕木貼金蹲龍鍍金銅龍蓋香爐一并香匙箸瓶紅  
錦墩二外紅簾三扇輦頂高二尺七寸有奇又鍍金銅  
寶珠頂帶仰覆蓮座高一尺三寸有奇垂攀頂黃線圓  
條四頂用丹漆上冒紅氊四垂以黃氊為如意雲黃氊  
緣條四周施黃綺漑水三層每層百三十二摺間繡五  
彩雲龍文或用大紅羅冒頂以黃羅為如意雲緣條漑  
水亦用黃羅頂下四周以紅氊為帷黃氊緣條四角鍍  
金銅雲四亭內寶蓋繡五龍頂以紅髹木匡冒以黃綺

為黃屋頂心四周繡雲龍各一輦亭四角至輦座用攀  
頂黃線圓條四并貼金木魚輦亭前左右轉角闌干二  
扇後一字帶轉角闌干一扇皆紅髹雕木渾貼金龍間  
以五彩雲板闌干內四周布席其闌干十二柱之飾及  
踏梯之屬俱與馬輦同

輦者肩行之車宋中興以後皇后嘗乘龍肩輿又以征  
伐道路險阻詔百官乘輦名曰竹輦子亦曰竹輿元皇  
帝用象輦駕以二象至用紅板輦則自明始也其制高

六尺九寸有奇頂紅髹近頂裝圓匡虬房窻鍍金銅火  
鍍寶帶仰覆蓮座四角鍍金銅雲朵轎扛二前後以鍍  
金銅龍頭龍尾裝釘有黃絨陸角索四周紅髹板左右  
門二用鍍金銅釘鉸轎內紅髹匡坐椅一福壽板一并  
褥椅內黃織金綺靠坐褥四周椅裙下鋪席并踏褥有  
黃絹轎衣油絹雨衣各一青氊衣紅氊緣條雲子嘉靖  
十三年謁廟帝及后妃俱乘肩輿出宮至奉天門降輿  
升輅隆慶四年設郊祀慶成宴帝乘板輿由歸極門出

入皇極門至殿上降輿

車駕之出有具服幄殿按周官大小次木架葦障上下  
四旁周以幄帟以象宮室明鹵簿載具服幄殿儀仗有  
黃帳房仍元制也帳并帷幕以黃木棉布為之上施獸  
吻柱竿紅髹竿首彩裝蹲獅檀頂

耕根車世宗朝始造漢有耕車晉曰耕根車俱天子親  
耕所用嘉靖十年帝將耕藉田詔造耕根車禮官上言  
考大明集禮耕藉用宋制柔玉輅以耕根車載耒耜同

行今考儀注順天府官奉耒耜及種稜種置彩輿先於祭前二日而出今用耕根車以載耒耜宜令造車於祭祀日早進呈置耒耜先玉輅以行第稽諸禮書祇有圖式而無高廣尺寸宜依今置車式差小通用青質從之皇后輅一高一丈一尺三寸有奇平盤前後車樞並雁翅四垂如意滴珠板轅長一丈九尺六寸皆紅髹轅用抹金銅鳳頭鳳尾鳳翎葉片裝釘平盤左右垂護泥板及輪二貫軸一每輪輻十有八皆紅髹輞以抹金釵花

銅葉片裝釘輪內車轂用抹金銅釵蓮花瓣輪盤裝釘  
軸中纏黃絨駕轅諸索輅亭高五尺八寸有奇紅髹四  
柱檻座上沉香色描金香草板十二片前左右有門高  
四尺五寸有奇廣二尺四寸有奇門旁沉香色線金菱  
花榻各二下條環板有明杓抹金銅釵花葉片裝釘後  
紅髹五山屏風戲金鸞鳳雲文屏上紅髹板戲金雲文  
中裝雕木渾貼金鳳一屏後紅髹板俱用抹金銅釵花  
葉片裝釘亭底紅髹上施紅花毯紅錦褥席紅髹坐椅



一靠背雕木線金五彩裝鳳一上下香草雲板各一紅

福壽板一并褥椅中黃織金綺靠坐褥四周有椅裙施

黃綺帷幔

或黃線羅

外用紅簾十二扇前二柱餞金上寶相

花中鸞鳳雲文下龜文錦輅頂并圓盤高二尺有奇抹

金銅立鳳頂帶仰覆蓮座垂攀頂黃線圓條四盤上紅

髹下四周沉香色描金雲文內青地五彩雲文以青飾

輅蓋內寶蓋紅髹匡鬪以八頂冒以黃綺頂心及四周

繡鳳九并五彩雲文天輪三層紅髹上雕木貼金邊耀

葉板七十二片內飾青地雕木五彩雲鸞鳳文三層間  
繪五彩雲襯板七十二片下四周黃銅裝釘上施黃綺  
漉水三層間繡鸞鳳文四垂青綺絡帶繡鸞鳳各一圓  
盤四角連輅座板用攀頂黃線圓條四輅亭前後有左  
右轉角闌干各二扇內嵌條環板皆紅髹計十二柱柱  
首雕木紅蓮花線金青綠裝蓮花抱柱其踏梯行馬之  
屬與大馬輦同

安車本周禮后五輅之一應劭漢官鹵簿圖有五色安

車晉皇后乘雲母安車唐皇后安車制如金輅明皇后  
安車獨簡素其制高九尺七寸有奇平盤前後車櫺並  
雁翅板轅二長一丈六尺七寸有奇皆紅髹用抹金銅  
鳳頭鳳尾鳳翎葉片裝釘平盤左右垂護泥板及輪二  
貫軸一每輪輻十有八皆紅髹軸中纏黃絨駕轅諸索  
車亭高四尺四寸紅髹方柱四上裝五彩花板十二片  
前左右有門高三尺七寸有奇廣二尺二寸有奇門旁  
紅髹十字榻各二後三山屏風屏後壁板俱紅髹用抹

金銅鈸花葉片裝釘亭底紅髹板上施紅花毯紅錦褥  
四周施黃綺帷幔外用紅簾四扇車蓋用紅髹抹金銅  
寶珠頂帶蓮座高六寸四角抹金銅鳳頭用攀條四並  
紅髹木魚蓋施黃綺瀝水三層銷金鸞鳳文鳳頭下垂  
紅粉錯其踏梯行馬幃衣與輅同行障坐障自唐宋有  
之皇后重翟車後皆有行障六坐障三左右夾車宮人  
執之而唐人宋史不載其制金史行障長八尺高六尺  
坐障長七尺高五尺明皇后用行障坐障皆以紅綾為

之繪升降鸞鳳雲文行障繪瑞草於漉水生障繪雲文於頂

太皇太后皇太后輅及安車行障坐障制與皇后同

皇妃車曰鳳輶與歷代異名其制青頂上抹金銅珠頂

四角抹金銅飛鳳各一垂銀香圓寶蓋并彩結轎身紅

髹木匡三面篾織紋簟繪以翟文抹金銅釵花葉片裝

釘紅髹捆飾以抹金銅鳳頭鳳尾青銷金羅緣邊紅簾

并看帶內紅交牀并坐踏褥紅銷金羅轎衣一頂用銷

金寶珠文瀝水香草文看帶并幃皆鳳文紅油絹雨轎  
衣一自皇后以下皆用行障二坐障一第別以彩繪皇  
妃行障坐障俱紅綾為之繪雲鳳而行障瀝水繪香草  
皇太子金輅高一丈二尺二寸有奇廣八尺九寸轅長  
一丈九尺五寸輅座高三尺二寸有奇平盤滴珠板輪  
輻輪輞悉同玉輅輅亭高六尺四寸有奇紅髹四柱長  
五尺四寸楹座上四周緣金五彩香草板前左右有門  
高五尺有奇廣二尺四寸有奇門旁榻各二編紅線條

及明欵皆紅髹後五山屏風青地上雕木貼金龍五間  
以五彩雲文屏後紅髹板皆抹金銅釵花葉片裝釘紅  
髹匡軟座紅髹墜座大索四下垂蓮花墜石上施紅毯  
紅錦褥席紅髹椅一納板一并褥椅中紅織金綺靠坐  
褥四周有椅裙施紅羅帷幔外用青綺緣邊紅簾十二  
扇椅雕貼金龍彩雲下緣金彩雲板一亭內編紅線條  
輅頂并圓盤高二尺五寸有奇又鍍金銅寶珠頂帶仰  
覆蓮座高九寸垂攀頂紅線圓條四盤上丹漆下內外

皆青地繪雲文以青飾輅蓋亭內周圍青斗拱承以丹  
漆匡寶蓋闢以八頂冒以紅綺頂心繡雲龍餘繡五彩  
雲文天輪三層皆紅髹上雕木貼金邊耀葉板七十二  
片內飾青地雕木貼金雲龍文三層間繪五彩雲襯板  
七十二片四周黃銅裝釘上施紅綺瀝水三層每層七  
十二摺間繡五彩雲龍文四角之飾與大輅同第圓條  
用紅線輅亭前一字闌干一扇後一字帶轉角闌干一  
扇左右闌干二扇內嵌五彩雲板皆丹漆計十四柱柱



首制與大輅同亭後建紅旗二以紅羅為之九旂每旂  
內外繡升龍一左旗腰繡日月北斗竿用抹金銅龍首  
右旗腰繡蔽字竿用抹金銅戟紹抹金銅鈴二垂紅纓  
其踏梯行馬之屬與玉輅同帳房用青木棉布竿首青  
綠蹲狻餘同乘輿帳房

東宮妃車亦曰鳳輶小輶制同皇妃行障坐障之制亦  
同

親王象輅其高視金輅減六寸其廣減一尺轅長視大

輅減一尺輅座高三尺有奇餘飾同金輅輅亭高五尺  
二寸有奇紅髹四柱檻座上四周紅髹條環板前左右  
有門高四尺五寸有奇廣二尺二寸有奇門旁榻各二  
及明杖後五山屏風皆紅髹用抹金銅鈹花葉片裝釘  
亭底紅髹施紅花毯紅錦褥席其椅靠坐褥帷幔紅簾  
之制俱同金輅輅頂并圓盤高二尺四寸有奇用抹金  
銅寶珠頂餘同金輅天輅三層皆紅髹上雕木貼金邊  
耀葉六十三片內飾青地雕木五彩雲文三層間繪五

彩雲襯板六十三片四周黃銅裝釘上施紅綺瀝水三層每層八十一摺繡瑞草文前垂青綺絡帶二俱繡升龍五彩雲文圓盤四角連輅座板用攀頂紅線圓條四并紅髹木魚亭前後闌干同金輅左右闌干各一扇內嵌條環板皆紅髹計十四柱柱首雕木紅蓮花線金青綠裝蓮花抱柱前闌干內布花毯紅旗二與金輅所樹同竿上祇垂紅纓五其踏梯行馬之屬亦同金輅帳房用綠色螭頭餘與東宮同

親王妃車亦曰鳳轎小轎制俱同東宮妃惟鳳轎衣用木紅平羅小轎衣二一用碧紅素紵絲一用木紅平羅行障坐障制同東宮妃

公主車宋用厭翟車明初因之其後定制鳳轎行障坐障如親王妃

皇孫車永樂中定皇太孫婚禮儀仗如親王降皇太子一等而用象輅

郡王無輅祇有帳房制同親王

郡王妃及郡主俱用翟轎制與王妃鳳轎同第易鳳為翟行障坐障同親王妃而繪雲翟文

百官乘車之制洪武元年令凡車不得雕飾龍鳳文職官一品至三品用間金飾銀螭繡帶青縵四品五品素獅頭繡帶青縵六品至九品用素雲頭青帶青縵轎同車制庶民車及轎並用黑油齊頭平頂阜縵禁用雲頭六年令凡車轎禁丹漆五品以上車止用青縵婦女許坐轎官民老疾者亦得乘之景泰四年令在京三品以

上得乘轎弘治七年令文武官例應乘轎者以四人昇  
之其五府管事內外鎮守守備及公侯伯都督等不問  
老少皆不得乘轎違例乘轎及擅用八人者奏聞蓋自  
太祖不欲勲臣廢騎射雖上公出必乘馬永樂元年駙  
馬都尉胡觀越制乘晉王濟熿朱輜轎為給事中周  
景所劾有詔宥觀而賜濟熿書切責之惟文職大臣乘  
輜庶官亦乘馬又文臣皆許乘車大臣得乘安車後久  
廢不用正德四年禮部侍郎劉機言大明集禮公卿大

臣得乘安車因請定輜扇繖蓋品級等差帝以京城內安車繖蓋久不行却其請而命輜扇俱如例行嘉靖十五年禮部尚書霍韜言禮儀定式京官三品以上乘輜迺者文官皆用肩輿或乘女輜乞申明禮制俾臣下有所遵守乃定四品以下不許乘輜並禁用肩輿隆慶二年給事中徐尚劾應城伯孫文棟等乘輜出入驕僭無狀帝命奪文棟等俸乃諭兩京武職非奉特恩不許乘輜文官四品以下用帷輜者禁如例萬曆三年奏定勲

戚及武臣不許用帷轎肩輿并交牀上馬至若破格殊  
典則宣德中少保黃淮陪遊西苑嘗乘肩輿入禁中嘉  
靖間嚴嵩奉詔苑直年及八旬出入得乘肩輿武臣則  
郭勛朱希忠特命乘肩輿扈南巡蹕後遂賜常乘馬皆  
非制也

織蓋之制洪武元年令庶民不得用羅絹涼織但許用  
油紙雨織三年令京城內一品二品用織蓋其餘用雨  
織十六年令尚書侍郎左右都御史通政使太常卿應



天府尹國子祭酒翰林學士許張織蓋二十六年定一

品二品織用銀浮屠頂三品四品用紅浮屠頂俱用黑

色茶褐羅表紅絹裏三簷雨織用紅油絹五品紅浮屠

頂青羅表紅絹裏兩簷雨織同四品六品至九品用紅

浮屠頂青絹表紅絹裏兩簷雨織俱用油紙三十五年

官員織蓋不許用金繡朱丹裝飾公侯駙馬伯與一品

二品同成化九年今兩京官遇雨任用油織其涼織不

許張於京城

鞍轡之制洪武六年令庶民不得描金惟銅鐵裝飾二十六年定公侯一品二品用銀鍍鐵事件鞞用描銀三品至五品用銀鍍鐵事件鞞用油畫六品至九品用擺錫鐵事件鞞用油畫三十五年官民人等馬領下纓并鞞轡俱用黑色不許紅纓及描金嵌金天青朱紅裝飾軍民用鐵事件黑綠油鞞



明史卷六十五



總校官編修臣吳紹深

欽定四庫全書薈要

史部

明史卷六十八

六至



詳校官編修臣繆晉

欽定四庫全書薈要卷六千六百五十九 史部

明史卷六十六

大學士張廷玉等奉 敕修

志第四十二


輿服二

皇帝冕服

后妃冠服

皇太子親王以下冠服

皇帝冕服洪武元年學士陶安請製五冕太祖曰此禮



太繁祭天地宗廟服袞冕社稷等祀服通天冠絳紗袍  
餘不用三年更定正旦冬至聖節並服袞冕祭社稷先  
農冊拜亦如之十六年定袞冕之制冕前圓後方元表  
纁裏前後各十二旒旒五采玉十二珠五采纁十有二  
就就相去一寸紅絲組為纓黼纁充耳玉簪導袞元衣  
黃裳十二章日月星辰山龍華蟲六章織於衣宗彝藻  
火粉米黼黻六章繡於裳白羅大帶紅裏蔽膝隨裳色  
繡龍火山文玉革帶玉佩大綬六采赤黃黑白縹綠小

綬三色同大綬間施三玉環白羅中單黻領青綠襪黃

鞞黃金鳥飾二十六年更定袞冕十二章冕版廣一尺

二寸長二尺四寸冠上有覆元表朱裏餘如舊制圭長

一尺二寸袞元衣纁裳十二章如舊制中單以素紗為

之紅羅蔽膝上廣一尺下廣二尺長三尺織火龍山三

章革帶佩玉長三尺三寸大帶素表朱裏兩邊用緣上

以朱錦下以綠錦大綬六采

黃白赤  
元纁綠

織成純元質五百

首凡合單紡為一系四系  
為一扶五扶為一首小綬三色同大綬間織三玉



環朱鞮赤舄永樂三年定冕冠以皂紗為之上覆曰緹

桐板為質衣之以綺元表朱裏前圓後方以玉衡維冠

玉簪貫紐紐與冠武

足前體下曰武緹在冠之下亦曰武

并繫纓處皆飾

以金緹以左右垂黻纒充耳

用黃玉

繫以元統承以白玉

瑱朱紘餘如舊制玉圭長一尺二寸剡其上刻山四以

象四鎮之山蓋周鎮圭之制異於大圭不瑑者也以黃

綺約其下別以囊韜之金龍文袞服十有二章元衣八

章日月龍在肩星辰山在背火華蟲宗彝在袖

每袖各三

皆

織成本色領標襖裾

標者袖端  
襖者衣緣

纁裳四章織藻粉米黼

黻各二前三幅後四幅前後不相屬共腰有辟積本色

縹裼

裳側有純謂之縹裳下有純謂之裼純者緣也

中單以素紗為之青領標

襖裾領織黻文十三蔽膝隨裳色四章織藻粉米黼黻

各二本色緣有紉施於縫中玉鉤二玉佩二各用玉珩

一瑀一琚二衝牙一璜二瑀下垂玉花一玉滴二瑑飾

雲龍文描金自珩而下繫組五貫以玉珠行則衝牙二

滴與璜相觸有聲金鉤二有二小綬六采

黃白赤  
元縹綠

纁質

三小綬色同大綬間施三玉環龍文皆織成韞舄皆赤  
色舄用黑鈎純以黃飾舄首嘉靖八年諭閣臣張璠袞  
冕有革帶今何不用璠對曰按陳祥道禮書古革帶大  
帶皆謂之鞶革帶以繫佩韍然後加以大帶而笏搢於  
二帶之間夫革帶前繫韍後繫綬左右繫佩自古冕弁  
恒用之今惟不用革帶以至前後佩服皆無所繫遂附  
屬裳要之間失古制矣帝曰冕服祀天地享祖宗若闕  
革帶非齊明盛服之意及觀會典載蔽膝用羅上織火

山龍三章并大帶緣用錦皆與今所服不合卿可并革  
帶繫蔽膝佩綬之式詳考繪圖以進又云衣裳分上下  
服而今衣恒掩裳裳制如帷而今兩幅朕意衣但當與  
裳要下齊而露裳之六章何如已又諭璉以變更祖制  
為疑璉對曰臣考禮制衣不掩裳與聖意允合夫衣六  
章裳六章義各有取衣自不容掩裳大明集禮及會典  
與古制不異今衣八章裳四章故衣常掩裳然於典籍  
無所準內閣所藏圖註蓋因官司織造循習訛謬今訂

正之乃復祖制非有變更帝意乃決因復諭璵曰衣有

六章古以繪今當以織朕命織染局考國初冕服日月

各徑五寸當從之裳六章古用繡亦當從之古色用元

黃取象天地今裳用纁於義無取當從古革帶即束帶

後當用玉以佩綬繫之於下蔽膝隨裳色其繡上龍下

火可不用山卿與內閣諸臣同考之於是揚一清等詳

議袞冕之服自黃虞以來元衣黃裳為十二章日月星

辰山龍華蟲其序自上而下為衣之六章宗彝藻火粉

米黼黻其序自下而上為裳之六章自周以後寔變其制或八章或九章已戾於古矣我太祖皇帝復定為十二章之制司造之官仍習舛訛非制作之初意伏乞聖斷不疑帝乃令擇吉更正其制冠以圓匡烏紗冒之旒綴七采玉珠十二青纒充耳綴玉珠二餘如舊制元衣黃裳衣裳各六章洪武間舊制日月徑五寸裳前後連屬如帷六章用繡蔽膝隨裳色羅為之上繡龍一下繡火三繫於革帶大帶素表朱裏上緣以朱下以綠革帶

前用玉其後無玉以佩綬繫而掩之中單及圭俱如永樂間制朱韞赤舄黃條緣元纓結

皇帝通天冠服洪武元年定郊廟省牲皇太子諸王冠婚醮戒則服通天冠絳紗袍冠加金博山附蟬十二首施珠翠黑介幘組纓玉簪導絳紗袍深衣製白紗內單皂領襍襪裾絳紗蔽膝白假帶方心曲領白韞赤舄其革帶佩綬與宸服同

皇帝皮弁服朔望視朝降詔降香進表四夷朝貢外官

朝覲策士傳臚皆服之嘉靖以後祭太歲山川諸神亦服之其制自洪武二十六年定皮弁用烏紗冒之前後各十二縫每縫綴五采玉十二以為飾玉簪導紅組纓其服絳紗衣蔽膝隨衣色白玉佩革帶玉鉤鐔緋白大帶白鞮黑烏永樂三年定皮弁如舊制惟縫及冠武弁貫簪繫纓處皆飾以金玉圭長如冕服之圭有脊并雙植文絳紗袍本色領標襪裾紅裳但不織章數中單紅領標襪裾餘俱如冕服內制



皇帝武弁服明初親征遣將服之嘉靖八年諭閣臣張  
璉云會典紀親征類禡之祭皆具武弁服不可不備璉  
對周禮有韋弁謂以韎韋為弁又以為衣裳國朝視古  
損益有皮弁之制今武弁當如皮弁但皮弁以黑紗冒  
之武弁當以絳紗冒之隨具圖以進帝報曰覽圖有韎  
形但無繫處冠制古象上尖今皮弁則圓朕惟上銳取  
其輕利當如古制又衣裳韠舄皆赤色何謂且佩綬俱  
無於祭用之可乎璉對自古服冕弁俱用革帶以前繫

黻後繫綬韋弁之鞞正繫於革帶耳武事尚威烈故色  
純用赤帝復報璫冠服衣裳鞞烏俱如古制增革帶佩  
綬及圭乃定制弁上銳色用赤上十二縫中綴五采玉  
落落如星狀黻衣鞞裳鞞鞞俱赤色佩綬革帶如常制  
佩綬及鞞鞞俱上繫於革帶烏如裳色玉圭視鎮圭差  
小剡上方下有篆文曰討罪安民

皇帝常服洪武三年定烏紗折角向上巾盤領窄袖袍  
束帶間用金琥珀透犀永樂三年更定冠以烏紗冒之

折角向上其後名翼善冠袍黃盤領窄袖前後及兩肩各織金盤龍一帶用玉鞞以皮為之先是洪武二十四年帝微行至神樂觀見有結網巾者翼日命取網巾頒示十三布政使司人無貴賤皆裹網巾於是天子亦常服網巾又會典載皇太孫冠禮有云掌冠跪加網巾而皇帝皇太子冠服俱闕而不載嘉靖七年更定燕弁服初帝以燕居冠服尚沿習俗諭張璉考古帝王燕居法服之制璉乃采禮書元端深衣之文圖註以進帝為參

定其制諭璉詳議璉言古者冕服之外元端深衣其用最廣元端自天子達於士國家之命服也深衣自天子達於庶人聖賢之法服也今以元端加文飾不易舊制深衣易黃色不離中衣誠得帝王損益時中之道帝因諭禮部曰古元端上下通用今非古人比雖燕居宜辨等威因酌古制更名曰燕弁寓深宮獨處以燕安為戒之意其制冠匡加皮弁之制冒以烏紗分十有二瓣各以金線壓之前飾五采玉雲各一後列四山朱條為組

纓雙玉簪服如古元端之制色元邊緣以青兩肩繡日

月前盤圓龍一後盤方龍二邊加龍文八十一領與兩

袪共龍文五九袪同前後齊共龍文四九襯用深衣之

制色黃袂圓袪方下齊負繩及踝十二幅素帶朱裏青

表綠緣邊腰圍飾以玉龍九元履朱緣紅纓黃結白鞵

皇后冠服洪武三年定受冊謁廟朝會服禮服其冠圓

匡冒以翡翠上飾九龍四鳳大花十二樹小花數如之

兩博鬢十二鈿褱衣深青繪翟赤質五色十二等素紗

中單黻領朱羅縠標襪裾蔽膝隨衣色以緞為領緣用  
翟為章三等大帶隨衣色朱裏紕其外上以朱錦下以  
緣錦紐約用青組玉革帶青鞵青舄以金飾永樂三年  
定制飾翠龍九金鳳四中一龍銜大珠一上有翠蓋下  
垂珠結餘皆口銜珠滴珠翠雲四十片大珠花小珠花  
數如舊三博鬢飾以金龍翠雲皆垂珠滴翠口圈一副  
上飾珠寶鈿花十二翠鈿如其數托裏金口圈一副珠  
翠面花五事珠排環一對阜羅額子一描金龍文用珠

二十一翟衣深青織翟文十有二等間以小輪花紅領  
標襖裾織金雲龍文中單玉色紗為之紅領標襖裾織  
黻文十三蔽膝隨衣色織翟為章三等間以小輪花四  
以緞為領緣織金雲龍文玉穀圭長七寸剡其上琢穀  
文黃綺約其下韜以黃囊金龍文玉革帶青綺鞞描金  
雲龍文玉事件十金事件四大帶表裏俱青紅相半末  
純紅下垂織金雲龍文上朱緣下綠緣青綺副帶一綬  
五采黃赤白縹綠纁質間施二玉環皆織成小綬三色

同大綬玉佩二各用玉珩一瑀一琚二衝牙一璜二瑀  
下垂玉花一玉滴二環飾雲龍文描金自珩而下繫組  
五貫以玉珠行則衝牙二滴與二璜相觸有聲上有金  
鈎有小綬五采以副之纁質織成青鞵烏飾以描金雲  
龍阜純每烏首加珠五顆

皇后常服洪武三年定雙鳳翊龍冠首飾釧鐲用金玉  
珠寶翡翠諸色團衫金繡龍鳳文帶用金玉四年更定  
龍鳳珠翠冠真紅大袖衣霞帔紅羅長裙紅褙子冠制



如特髻上加龍鳳飾衣用織金龍鳳文加繡飾永樂三

年更定冠用卓穀附以翠博山上飾金龍一翅以珠翠

鳳二皆口銜珠滴前後珠牡丹二花八蕊翠葉三十六

珠翠穰花鬢二珠翠雲二十一翠口圈一金寶鈿花九

飾以珠金鳳二口銜珠結三博鬢飾以鸞鳳金寶鈿二

十四邊垂珠滴金簪二珊瑚鳳冠背一副大彩霞帔衫

黃霞帔深青織金雲霞龍文或繡或鋪翠圈金飾以珠

玉墜子瑑龍文四襖襖子

子即襜

深青金繡團龍文鞠衣

紅色前後織金雲龍文或繡或鋪翠圈金飾以珠大帶  
紅綫羅為之有緣餘或青或綠各隨鞠衣色緣襪襖子  
黃色紅領標襪裾皆織金采色雲龍文緣襪裙紅色綠  
緣襪織金采色雲龍文玉帶如翟衣內制第減金事件  
一玉花采結綬以紅綠綫羅為結玉綬花一琢雲龍文  
綬帶玉墜珠六金垂頭花瓣四小金葉六紅綫羅繫帶  
一白玉雲樣玳瑁二如佩制有金鈎金如意雲蓋一下  
懸紅組五貫金方心雲板一俱釵雲龍文襯以紅綺下

垂金長頭花四中小金鐘一末綴白玉雲朶五青鞵烏  
與翟衣內制同

皇妃皇嬪及內命婦冠服洪武三年定皇妃受冊助祭  
朝會禮服冠飾九翬四鳳花釵九樹小花數如之兩博  
鬢九鈿翟衣青質繡翟編次於衣及裳重為九等青衫  
中單黻領朱縠標襪裾蔽膝隨裳色加文繡重雉為章  
二等以緞為領緣大帶隨衣色玉革帶青鞵烏佩綬常  
服鸞鳳冠首飾釧鐲用金玉珠寶翠諸色團衫金繡鸞

鳳不用黃帶用金玉犀又定山松特髻假鬢花鈿或花  
釵鳳冠真紅大袖衣霞帔紅羅裙褙子衣用織金及繡  
鳳文永樂三年更定禮服九翟冠二以阜穀為之附以  
翠博山飾大珠翟二小珠翟三翠翟四皆口銜珠滴冠  
中寶珠一座翠頂雲一座其珠牡丹翠穰花鬢之屬俱  
如雙鳳翊龍冠制第減翠雲十又翠牡丹花穰花各二  
面花四梅花環四珠環各二其大衫霞帔燕居佩服之  
飾俱同中宮第織金繡瑒俱雲霞鳳文不用雲龍文九

嬪冠服嘉靖十年始定冠用九翟次皇妃之鳳大衫鞠  
衣如皇妃制圭用次玉穀文內命婦冠服洪武五年定  
三品以上花釵翟文四品五品山松特髻大衫為禮服  
貴人視三品以皇妃燕居冠及大衫霞帔為禮服以珠  
翠慶雲冠鞠衣褶子緣襪襖裙為常服

宮人冠服制與宋同紫色團領窄袖徧刺折枝小葵花  
以金圈之珠絡縫金帶紅裙弓樣鞵上刺小金花烏紗  
帽飾以花帽額綴團珠結珠鬢梳垂珠耳飾

皇太子冠服陪祀天地社稷宗廟及大朝會受冊納妃

則服袞冕洪武二十六年定袞冕九章冕九旒旒九玉

金簪導紅組纓兩玉珎圭長九寸五分元衣纁裳衣五

章織山龍華蟲宗彝火裳四章織藻粉米黼黻白紗中

單黻領蔽膝隨裳色織火山二章革帶金鈎鑿玉佩綬

五采赤白元  
纁綠織成純赤纁三百三十首小綬三色同間

織三玉環大帶白表朱裏上緣以紅下緣以綠白韞赤

舄永樂三年定冕冠元表朱裏前圓後方前後各九旒

每旒五采纁九就貫五采玉九赤白青黃黑相次玉衡

金簪元紉垂青纁充耳

用青玉

承以白玉瑱朱紘纓玉圭

長九寸五分以錦約其下并韜袞服九章元衣五章龍

在肩山在背火華蟲宗彝在袖

每袖各三

皆織成本色領標

襜褕纁裳四章織藻粉米黼黻各二前三幅後四幅不

相屬共腰有襜積本色紳裼中單以素紗為之青領標

襜褕領織黻文十二蔽膝隨裳色四章織藻粉米黼黻

本色緣有紉施於縫中上玉鉤二玉珣二各用玉珩一

瑤一琚一衝牙一璜三瑤下垂玉花一玉滴二塚雲龍

文描金自珩而下繫組五貫以玉珠上有金鈎小綬四

采

赤白  
縹綠

以副之纁質大帶素表朱裏在腰及垂皆有緝

上緝以朱下緝以綠紐約用青組大綬四采

赤白  
縹綠

纁質

小綬三采間施二玉環龍文皆織成鞞烏皆赤色烏用

黑鈎純黑飾烏首朔望朝降詔降香進表外國朝貢朝

覲則服皮弁永樂三年定皮弁冒以烏紗前後各九縫

每縫綴五采玉九縫及冠武弁貫簪繫纓處皆飾以金



金簪朱纓玉圭如冕服內制絳紗袍本色領標襪裾紅  
裳如冕服內裳制但不織章數中單以素紗為之如深  
衣制紅領標襪裾領織黻文十一蔽膝隨裳色本色緣  
有紉施於縫中其上玉鉤二玉佩如冕服內制但無雲  
龍文有小綬四采以副之大帶大綬鞮烏赤色皆如冕  
服內制其常服洪武元年定烏紗折上巾永樂三年定  
冠烏紗折角向上巾

亦名翼善冠親王  
郡王及世子俱同

袍赤盤領窄袖

前後及兩肩各金織盤龍一玉帶鞞以皮為之

皇太子妃冠服洪武三年定禮服與皇妃同永樂三年更定九翬四鳳冠漆竹絲為匡冒以翡翠上飾翠翬九金鳳四皆口銜珠滴珠翠雲四十片大珠花九樹小珠花數如之雙博鬢飾以鸞鳳皆垂珠滴翠口圈一副上飾珠寶鈿花九翠鈿如其數托裏金口圈一副珠翠面花五事珠排環一對珠阜羅額子一描金鳳文用珠二十一翟衣青質織翟文九等間以小輪花紅領標襪裾織金雲龍文中單玉色紗為之紅領標襪裾領織黻文

十一蔽膝隨衣色織翟為章二等間以小輪花三以緞

為領緣織金雲鳳文其玉圭帶綬玉佩鞬舄之制俱同

皇妃洪武三年又定常服犀冠刻以花鳳首飾釧鐲衫

帶俱同皇妃四年定冠亦與皇妃同永樂三年定燕居

冠以阜穀為之附以翠博山上飾寶珠一座翊以二珠

翠鳳皆口銜珠滴前後珠牡丹二花八蕊翠葉三十六

珠翠穰花鬢二珠翠雲十六片翠口圈一副金寶鈿花

九上飾珠九金鳳一對口銜珠結雙博鬢飾以鸞鳳金

寶鈿十八邊垂珠滴金簪一對珊瑚鳳冠觜一副其大衫霞帔燕居佩服之飾俱同皇妃

親王冠服助祭謁廟朝賀受冊納妃服袞冕朔望朝降詔降香進表四夷朝貢朝覲服皮弁洪武二十六年定冕服俱如東宮第冕旒用五采玉圭長九寸二分五釐青衣纁裳永樂三年又定冕服皮弁制俱與東宮同其常服亦與東宮同嘉靖七年諭禮部朕仿古元端自為燕弁冠服更制忠靜冠服錫於有位而宗室諸王制猶

未備今酌燕弁及忠靜冠之制復為式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授伴讀俱用忠靜冠服依其品服之儀賓及餘官不許槩服夫忠靜冠服之異式尊賢之等也保和冠服之異式親親之殺也等殺既明庶幾乎禮之所保保斯和和斯安此錫名之義也其以圖說頒示諸王府如敕遵行保和冠制以燕弁為準用九緗去簪與五玉後山一扇分畫為四服青質青緣前

後方龍補身用素地邊用雲襯用深衣玉色帶青表綠裏綠緣履用阜綠結白鞵

親王妃冠服受冊助祭朝會服禮服洪武三年定九翬四鳳冠永樂三年又定九翟冠制同皇妃其大衫霞帔燕居佩服之飾同東宮妃第金事件減一玉綬花瑑寶相花文

公主冠服與親王妃同惟不用圭

親王世子冠服聖節千秋節并正旦冬至進賀表箋及

父王生日諸節慶賀皆服袞冕洪武二十六年定袞冕

七章冕三采玉珠七旒圭長九寸青衣三章織華蟲火

宗彝纁裳四章織藻粉米黼黻素紗中單青領襪赤黻

革帶佩白玉元組綬綬紫質用三采

紫黃赤

織成間織三

白玉環白鞵赤烏永樂三年更定冕冠前後各八旒每

旒五采繅八就貫三采玉珠八赤白青色相次玉圭長

九寸青衣三章火在肩華蟲宗彝在兩袖皆織成本色

領標襪裾其纁裳玉佩帶綬之制俱與親王同第領織

黻文減二皮并用烏紗冒之前後各八縫每縫綴三采  
玉八餘制如親王其圭佩帶綬鞵烏如冕服內制常服  
亦與親王同嘉靖七年定保和冠服以燕弁為準用八  
襖去簪玉後山以一扇分畫為四服與親王同

世子妃冠服永樂三年定與親王妃同惟冠用七翟

郡王冠服永樂三年定冕冠前後各七旒每旒五采纁  
七就貫三采玉珠七圭長九寸青衣三章粉米在肩藻  
宗彝在兩袖皆織成纁裳二章織黼黻各二中單領織



黻文七餘與親王世子同皮弁前後各七縫每縫綴三采玉七餘與親王世子同其圭佩帶綬鞵烏如冕服內制常服亦與親王世子同嘉靖七年定保和冠服冠用七襖服與親王世子同

郡王妃冠服永樂三年定冠用七翟與親王世子妃同其大衫霞帔燕居佩服之飾俱同親王妃第繡雲霞翟文不用盤鳳文

郡王長子朝服七梁冠大紅素羅衣白素紗中單大紅

素羅裳及蔽膝大紅素羅白素紗二色夾帶玉朝帶丹  
礬紅花錦錦雞綬玉佩象笏白絹鞞皂皮雲頭履鞮公  
服阜縐紗幘頭大紅素紵絲衣玉革帶常服烏紗帽大  
紅紵絲織金獅子開襟圓領玉束帶阜皮銅線鞞其保  
和冠如忠靜之制用五楸服與郡王同補子用織金方  
龍

郡主冠服永樂三年定與郡王妃同惟不用圭減四珠  
環一對

郡王長子夫人冠服珠翠五翟冠大紅紵絲大衫深青  
紵絲金繡翟褙子青羅金繡霞帔金墜頭

鎮國將軍冠服與郡王長子同鎮國將軍夫人冠服與  
郡王長子夫人同輔國將軍冠服與鎮國將軍同惟冠  
六梁帶用犀輔國將軍夫人冠服與鎮國將軍夫人同  
惟冠用四翟抹金銀墜頭奉國將軍冠服與輔國將軍  
同惟冠五梁帶用金釵花常服大紅織金虎豹奉國將  
軍淑人冠服與輔國將軍夫人同惟褙子霞帔金繡孔

雀文鎮國中尉冠服與奉國將軍同惟冠四梁帶用素

金佩用藥玉鎮國中尉恭人冠服與奉國將軍淑人同

輔國中尉冠服與鎮國中尉同惟冠三梁帶用銀釵花

綬用盤雕公服用深青素羅常服紅織金熊羆輔國中

尉宜人冠服與鎮國中尉恭人同惟冠用三翟褙子霞

帔金繡鴛鴦文銀墜頭奉國中尉冠服與輔國中尉同

惟冠二梁帶用素銀綬用練鵲幘頭黑漆常服紅織金

彪奉國中尉安人冠服與輔國中尉宜人同惟大衫用

丹礬紅褙子霞帔金繡練鵲文

縣主冠服珠翠五翟冠大紅紵絲大衫深青紵絲金繡  
孔雀褙子青羅金繡孔雀霞帔抹金銀墜頭郡君冠服  
與縣主同惟冠用四翟褙子霞帔金繡鴛鴦文縣君冠  
服與郡君同惟冠用三翟鄉君冠服與縣君同惟大衫  
用丹礬紅褙子霞帔金繡練鵲文

欽定四庫全書薈要卷六千六百六十 史部

明史卷六十七

大學士張廷玉等奉 勅修

志第四十三

輿服三

文武官冠服

命婦冠服

內外官親屬冠服

內使冠服

侍儀以下冠服

士庶冠服

樂工冠服

軍隸冠服

外蕃冠服

僧道服色

羣臣冠服洪武元年命制公服朝服以賜百官時禮部  
言各官先授散官與見任職事高下不同如御史董希  
哲前授朝列大夫澧州知州而任七品職事省司郎中  
宋冕前授亞中大夫黃州知府而任五品職事散官與  
見任之職不同故服色不能無異乞定其制乃詔省部  
臣定議禮部復言唐制服色皆以散官為準元制散官

職事各從其高者服色因之國初服色依散官與唐制同乃定服色準散官不計見職於是所賜袍帶亦並如之三年禮部言歷代異尚夏黑商白周赤秦黑漢赤唐服飾黃旂幟赤今國家承元之後取法周漢唐宋服色所尚於赤為宜從之

文武官朝服洪武二十六年定凡大祀慶成正旦冬至聖節及頒詔開讀進表傳制俱用梁冠赤羅衣白紗中單青飾領緣赤羅裳青緣赤羅蔽膝大帶赤白二色絹



革帶佩綬白襪黑履一品至九品以冠上梁數為差公

冠八梁加籠中貂蟬立筆五折四柱香草五段前後玉

蟬侯七梁籠中貂蟬立筆四折四柱香草四段前後金

蟬伯七梁籠中貂蟬立筆二折四柱香草二段前後玳

瑁蟬俱插雉尾駙馬與侯同不用雉尾一品冠七梁不

用籠中貂蟬革帶與佩俱玉綬用黃綠赤紫織成雲鳳

四色花錦下結青絲網玉綬環二二品六梁革帶綬環

犀餘同一品三品五梁革帶金佩玉綬用黃綠赤紫織

成雲鶴花錦下結青絲網金綬環二四品四梁革帶金  
佩藥玉餘同三品五品三梁革帶銀釵花佩藥玉綬用  
黃綠赤紫織成盤鵬花錦下結青絲網銀鍍金綬環二  
一品至五品笏俱象牙六品七品二梁革帶銀佩藥玉  
綬用黃綠赤織成練鵲三色花錦下結青絲網銀綬環  
二獨御史服獬廌八品九品一梁革帶烏角佩藥玉綬  
用黃綠織成瀟瀟二色花錦下結青絲網銅綬環二六  
品至九品笏俱槐木其武官應直守衛者別有服色雜

職未入流品者大朝賀進表行禮止用公服三十年令  
視九品官用朝服嘉靖八年更定朝服之制梁冠如舊  
式上衣赤羅青緣長過腰指七寸毋掩下裳中單白紗  
青緣下裳七幅前三後四每幅三襞積赤羅青緣蔽膝  
綴革帶綬各從品級花樣革帶之後佩綬繫而掩之其  
環亦各從品級用玉犀金銀銅不以織於綬大帶表裏  
俱素惟兩耳及下垂緣綠又以青組約之革帶俱如舊  
式珮玉一如詩傳之制去雙滴及二珩其三品以上玉

四品以下藥玉及襪履俱如舊式萬厯五年令百官正旦朝賀毋僭躡朱履故事十一月百官戴煖耳是年朝覲外官及舉人監生不許戴煖耳入朝

凡親祀郊廟社稷文武官分獻陪祀則服祭服洪武二十六年定一品至九品青羅衣白紗中單俱皐領緣赤羅裳皐緣赤羅蔽膝方心曲領其冠帶佩綬等差並同朝服又定品官家用祭服三品以上去方心曲領四品以下并去佩綬嘉靖八年更定百官祭服上衣青羅皐

緣與朝服同下裳赤羅卑緣與朝服同蔽膝綬環大帶  
革帶佩玉襪履俱與朝服同其視牲朝日夕月耕藉祭  
歷代帝王獨錦衣衛堂上官大紅蟒衣飛魚烏紗帽鷹  
帶佩繡春刀祭太廟社稷則大紅便服

文武官公服洪武二十六年定每日早晚朝奏事及侍  
班謝恩見辭則服之在外文武官每日公座服之其制  
盤領右衽袍用紵絲或紗羅絹袖寬三尺一品至四品  
緋袍五品至七品青袍八品九品綠袍未入流雜職官

袍笏帶與八品以下同公服花樣一品大獨科花徑五寸二品小獨科花徑三寸三品散荅花無枝葉徑二寸四品五品小雜花紋徑一寸五分六品七品小雜花徑一寸八品以下無紋幘頭漆紗二等展角長一尺二寸雜職官幘頭垂帶後復令展角不用垂帶與入流官同笏依朝服為之腰帶一品玉或花或素二品犀三品四品金荔枝五品以下烏角鞞用青革仍垂撻尾於下鞞用皂其後朝常止便服惟朔望具公服朝參凡武官應

直守衛者別有服色不拘此制公侯駙馬伯服色花樣  
腰帶與一品同文武官花樣如無從織造則用素百官  
入朝雨雪許服雨衣奉天華蓋武英諸殿奏事必躡履  
鞮違者御史糾之萬歷五年令常朝俱衣本等錦繡服  
色其朝覲官見辭謝恩不論已未入流公服行禮

文武官常服洪武三年定凡常朝視事以烏紗帽團領  
衫束帶為公服其帶一品玉二品花犀三品金釵花四  
品素金五品銀釵花六品七品素銀八品九品烏角凡

致仕及侍親辭閣官紗帽束帶為事黜降者服與庶人

同至二十四年又定公侯伯駙馬束帶與一品同雜職

官與八品九品同朝官常服禮鞮洪武六年定先是百

官入朝遇雨皆躡釘鞮聲徹殿陛侍儀司請禁之太祖

曰古者入朝有履自唐始用鞮其令朝官為鞮底皮鞮

冒於鞮外出朝則釋之禮部言近奢侈越制詔申禁之

仍參酌漢唐之制頒行遵守凡職官一品二品用雜色

文綺綾羅綵繡帽頂帽珠用玉三品至五品用雜色文



綺綾羅帽頂用金帽珠除玉外隨所用六品至九品用  
雜色文綺綾羅帽頂用銀帽珠瑪瑙水晶香木一品至  
六品穿四爪龍以金繡為之者聽禮部又議品官見尊  
長用朝君公服於理未安宜別製梁冠絳衣絳裳革帶  
大帶大白襪烏烏佩綬其衣裳去緣襪三品以上佩綬  
三品以下不用從之二十二年令文武官遇雨戴雨帽  
公差出外戴帽子入城不許二十三年定制文官衣自  
領至裔去地一寸袖長過手復回至肘公侯駙馬與文

官同武官去地五寸袖長過手七寸二十四年定公侯

駙馬伯服繡麒麟白澤文官一品仙鶴二品錦鷄三品

孔雀四品雲雁五品白鷗六品鷺鷥七品鸚鵡八品黃

鸝九品鶴鶻雜職練鵲風憲官獬廌武官一品二品獅

子三品四品虎豹五品熊羆六品七品彪八品犀牛九

品海馬又令品官常服用雜色紵絲綾羅綵繡官吏衣

服帳幔不許用元黃紫三色并織繡龍鳳文違者罪及

染造之人朝見人員四時並用色衣不許純素三十年

令致仕官服色與見任同若朝賀謝恩見辭一體具服  
景泰四年令錦衣衛指揮侍衛者得衣麒麟天順二年  
定官民衣服不得用蟒龍飛魚斗牛大鵬像生獅子四  
寶相花大西番蓮大雲花樣并元黃紫及元色黑綠柳  
黃薑黃明黃諸色弘治十三年奏定公侯伯文武大臣  
及鎮守守備違例奏請蟒衣飛魚衣服者科道糾劾治  
以重罪正德十一年設東西兩官廳將士悉衣黃罩甲  
中外化之金緋盛服者亦必加此於上都督江彬等承

日紅笠之上綴以散染天鵝翎以為貴飾貴者飄三英  
次者二英兵部尚書王瓊得賜一英冠以下教場自謂  
殊遇其後巡狩所經督餉侍郎巡撫都御史無不衣罩  
甲見上者十三年車駕還京傳旨俾迎候者用曳撒大  
帽鷹帶尋賜羣臣大紅紵絲羅紗各一其服色一品斗  
牛二品飛魚三品蟒四品麒麟六七品虎彪翰林科道  
不限品級皆與焉惟部曹五品下不與時文臣服色亦  
以走獸而麒麟之服逮於四品尤異事也十八年世宗

登極詔云近來冒濫玉帶蟒龍飛魚斗牛服色皆庶官  
雜流并各處將領夤緣奏乞今俱不許武職卑官僭用  
公侯服色者亦禁絕之嘉靖六年復禁中外官不許濫  
服五彩裝花織造違禁顏色七年既定燕居法服之制  
閣臣張璁因言品官燕居之服未有明制詭異之徒競  
為奇服以亂典章乞更法古元端別為簡易之制昭布  
天下使貴賤有等帝因復製忠靜冠服圖頌禮部勅諭  
之曰祖宗稽古定制品官朝祭之服各有等差第常人

之情多謹於明顯怠於幽獨古聖王慎之制元端以為  
燕居之服比來衣服詭異上下無辨民志何由定朕因  
酌古元端之制更名忠靜庶幾乎進思盡忠退思補過  
焉朕已著為圖說如式製造在京許七品以上官及八  
品以上翰林院國子監行人司在外許方面官及各府  
堂官州縣正堂儒學教官服之武官止都督以上其餘  
不許濫服禮部以圖說頒布天下如勅奉行按忠靜冠  
仿古元冠冠匡如制以烏紗冒之兩山俱列於後冠頂

仍方中微起三梁各壓以金線邊以金緣之四品以下去金緣以淺色絲線忠靜服仿古元端服色用深青以紵絲紗羅為之三品以上雲四品以下素緣以藍青前後飾本等花樣補子深衣用玉色素帶如古大夫之帶制青表綠緣邊并裏素履青綠條結白襪十六年羣臣朝於駐蹕所兵部尚書張瓚服蟒帝怒諭閣臣夏言曰尚書二品何自服蟒言對曰瓚所服乃欽賜飛魚服鮮明類蟒耳帝曰飛魚何組兩角其嚴禁之於是禮部奏

定文武官不許擅用蟒衣飛魚斗牛違禁華異服色其  
大紅紵絲紗羅服惟四品以上官及在京五品堂上官  
經筵講官許服五品官及經筵不為講官者俱服青綠  
錦繡遇吉禮止衣紅布絨褐品官花樣並依品級錦衣  
衛指揮侍衛者仍得衣麒麟其帶俸非侍衛及千百戶  
雖侍衛不許僭用

歷朝賜服文臣有未至一品而賜玉帶者自洪武中學  
士羅復仁始行聖公秩正二品服織金麒麟袍玉帶則



景泰中入朝拜賜自是以為常內閣賜蟒衣自弘治中

劉健李東陽始麒麟本公侯服而內閣服之則嘉靖中

嚴嵩徐階皆受賜也仙鶴文臣一品服也嘉靖中成國

公朱希忠都督陸炳服之皆以元壇供事而學士嚴訥

李春芳董份以五品撰青詞亦賜仙鶴尋諭供事壇中

乃用於是尚書皆不敢衣鶴後勅南京織閃黃補麒麟

仙鶴賜嚴嵩閃黃乃上用服色也又賜徐階教子升天

蟒萬厯中賜張居正坐蟒武清侯李偉以太后父亦受

賜

儀賓朝服公服常服俱視品級與文武官同惟笏皆象牙常服花樣視武官弘治十三年定郡主儀賓釵花金帶胸背獅子縣主儀賓釵花金帶郡君儀賓光素金帶胸背俱虎豹縣君儀賓釵花銀帶鄉君儀賓光素銀帶胸背俱彪有僭用者革去冠帶戴平頭巾於儒學讀書習禮三年

狀元及諸進士冠服狀元冠二梁緋羅圓領白絹中單

錦綬蔽膝紗帽槐木笏光銀帶藥玉佩朝鞞氈襪皆御  
前頒賜上表謝恩日服之進士巾如烏紗帽頂微平展  
角闊寸餘長五寸許系以垂帶阜紗為之深藍羅袍緣  
以青羅袖廣而不殺槐木笏革帶青鞵飾以黑角垂撻  
尾於後廷試後頒於國子監傳臚日服之上表謝恩後  
謁先師行釋菜禮畢始易常服其中袍仍送國子監藏  
之

命婦冠服洪武元年定命婦一品冠花釵九樹兩博鬢

九鈿服用翟衣繡翟九重素紗中單黼領朱縠標襪裾  
蔽膝隨裳色以緞為領緣加文繡重翟為章二等玉帶  
青襪烏佩綬二品冠花釵八樹兩博鬢八鈿服用翟衣  
八等犀帶餘如一品三品冠花釵七樹兩博鬢七鈿翟  
衣七等金革帶餘如二品四品冠花釵六樹兩博鬢六  
鈿翟衣六等金革帶餘如三品五品冠花釵五樹兩博  
鬢五鈿翟衣五等烏角帶餘如四品六品冠花釵四樹  
兩博鬢四鈿翟衣四等烏角帶餘如五品七品冠花釵

三樹兩博鬢三鈿翟衣三等烏角帶餘如六品自一品至五品衣色隨夫用紫六品七品衣色隨夫用緋其大帶如衣色四年以古天子諸侯服袞冕后與夫人亦服禕翟今羣臣既以梁冠絳衣為朝服不敢用冕則外命婦亦不當服翟衣以朝命禮部議之奏定命婦以山松特髻假鬢花鈿真紅大袖衣珠翠蹙金霞帔為朝服以朱翠角冠金珠花釵闊袖雜色綠緣為燕居之服一品衣金繡文霞帔金珠翠妝飾玉墜二品衣金繡雲肩大

雜花霞帔金珠翠妝飾金墜子三品衣金繡大雜花霞  
帔珠翠妝飾金墜子四品衣繡小雜花霞帔翠妝飾金  
墜子五品衣銷金大雜花霞帔生色畫絹起花妝飾金  
墜子六品七品衣銷金小雜花霞帔生色畫絹起花妝  
飾鍍金銀墜子八品九品衣大紅素羅霞帔生色畫絹  
妝飾銀墜子首飾一品二品金玉珠翠三品四品金珠  
翠五品金翠六品以下金鍍銀間用珠五年更定品官  
命婦冠服一品禮服用山松特髻翠松五株金翟八口

銜珠結正面珠翠翟一珠翠花四朶珠翠雲喜花三朶

後鬢珠梭毬一珠翠飛翟一珠翠梳四金雲頭連三釵

一珠簾梳一金簪二珠梭環一雙大袖衫用真紅色霞

帔褙子俱用深青色紵絲綾羅紗隨用霞帔上施蹙金

繡雲霞翟文釵花金墜子褙子上施金繡雲霞翟文常

服用珠翠慶雲冠珠翠翟三金翟一口銜珠結鬢邊珠

翠花二小珠翠梳一雙金雲頭連三釵一金壓鬢雙頭

釵二金腦梳一金簪二金脚珠翠佛面環一雙鐲釧皆

用全長襖長裙各色紵絲綾羅紗隨用長襖緣襖或紫  
或綠上施蹙金繡雲霞翟文看帶用紅綠紫上施蹙金  
繡雲霞翟文長裙橫豎全繡纏枝花文二品特髻上金  
翟七口銜珠結餘同一品常服亦與一品同三品特髻  
上金孔雀六口銜珠結正面珠翠孔雀一後鬢翠孔雀  
二霞帔上施蹙金雲霞孔雀文釵花金墜子褙子上施  
金繡雲霞孔雀文餘同一品常服冠上珠翠孔雀三金  
孔雀二口銜珠結長襖緣襖看帶或紫或綠並繡雲霞



孔雀文長裙橫豎襴並繡纏枝花文餘同二品四品特  
髻上金孔雀五口銜珠結餘同三品常服亦與三品同  
五品特髻上銀鍍金鴛鴦四口銜珠結正面珠翠鴛鴦  
一小珠鋪翠雲喜花三朶後鬢翠鴛鴦二銀鍍金雲頭  
連三釵一小珠簾梳一鍍金銀簪二小珠梳環一雙霞  
帔上施繡雲霞鴛鴦文鍍金銀釵花墜子褶子上施雲  
霞鴛鴦文餘同四品常服冠上小珠翠鴛鴦三鍍金銀  
鴛鴦二挑珠牌鬢邊小珠翠花二朶雲頭連三釵一梳

一壓鬢雙頭釵二鍍金簪二銀脚珠翠佛面環一雙鐲  
釧皆用銀鍍金長襖綠襖繡雲霞鴛鴦文長裙橫豎襴  
繡纏枝花文餘同四品六品特髻上翠松三株銀鍍金  
練鵲四口銜珠結正面銀鍍金練鵲一小珠翠花四朵  
後鬢翠梭毬一翠練鵲二翠梳四銀雲頭連三釵一珠  
綠翠簾梳一銀簪二大袖衫綾羅紬絹隨所用霞帔施  
繡雲霞練鵲文釵花銀墜子褙子上施雲霞練鵲文餘  
同五品常服冠上鍍金銀練鵲三又鍍金銀練鵲二挑

小珠牌鐲釧皆用銀長襖緣襪看帶或紫或綠繡雲霞  
練鵲文長裙橫豎欄繡纏枝花文餘同五品七品禮服  
常服俱同六品其八品九品禮服惟用大袖衫霞帔褙  
子大衫同七品霞帔上繡纏枝花釵花銀墜子褙子上  
繡摘枝團花通用小珠慶雲冠常服亦用小珠慶雲冠  
銀間鍍金銀練鵲三又銀間鍍金銀練鵲二挑小珠牌  
銀間鍍金雲頭連三釵一銀間鍍金壓鬢雙頭釵二銀  
間鍍金腦梳一銀間鍍金簪二長襖緣襪看帶並繡纏

枝花餘同七品又定命婦團衫之制以紅羅為之繡重  
雉為等第一品九等二品八等三品七等四品六等五  
品五等六品四等七品三等其餘不用繡雉二十四年  
定制命婦朝見君后在家見舅姑并夫及祭祀則服禮  
服公侯伯夫人與一品同大袖衫真紅色一品至五品  
紵絲綾羅六品至九品綾羅紬絹霞帔褙子皆深青段  
公侯及一品二品金繡雲霞翟文三品四品金繡雲霞  
孔雀文五品繡雲霞鴛鴦文六品七品繡雲霞練鵲文

大袖衫領闊三寸兩領直下一尺間綴紐子三末綴紐子二紐在掩紐之下拜則放之霞帔二條各繡禽七隨品級用前四後三墜子中釵花禽一四面雲霞文禽如霞帔隨品級用笏以象牙為之二十六年定一品冠用金事件珠翟五珠牡丹開頭二珠半開二翠雲二十四片翠牡丹葉一十八片翠口圈一副上帶金寶鈿花八金翟二口銜珠結二二品至四品冠用金事件珠翟四珠牡丹開頭二珠半開四翠雲二十四片翠牡丹葉一

十八片翠口圈一副上帶金寶鈿花八金翟二口銜珠  
結二一品二品霞帔褙子俱雲霞翟文鈿花金墜子三  
品四品霞帔褙子俱雲霞孔雀文鈿花金墜子五品六  
品冠用抹金銀事件珠翟三珠牡丹開頭二珠半開五  
翠雲二十四片翠牡丹葉一十八片翠口圈一副上帶  
抹金銀寶鈿花八抹金銀翟二口銜珠結子二五品霞  
帔褙子俱雲霞鴛鴦文鈿金鈿花銀墜子六品霞帔褙  
子俱雲霞練鵲文鈿花銀墜子七品至九品冠用抹金

銀事件珠翟二珠月桂開頭二珠半開六翠雲二十四  
片翠月桂葉一十八片翠口圈一副上帶抹金銀寶鈿  
花八抹金銀翟二口銜珠結子二七品霞帔墜子襟子  
與六品同八品九品霞帔用繡纏枝花墜子與七品同  
襟子繡摘枝團花

內外官親屬冠服洪武元年禮部尚書崔亮奉詔議定  
內外官父兄伯叔子孫弟姪用烏紗帽軟腳垂帶圓領  
衣烏角帶品官祖母及母與子孫同居親弟姪婦女禮

服合以本官所居官職品級通用漆紗珠翠慶雲冠本品衫霞帔褙子緣襖襖裙惟山松特髻子止許受封誥勅者用之品官次妻許用本品珠翠慶雲冠褙子為禮服銷金闊領長襖長裙為常服二十五年令文武官父兄伯叔弟姪子壻皆許穿鞢

內使冠服明初置內使監冠烏紗描金曲脚帽衣胸背花盤領窄袖衫烏角帶鞞用紅扇面黑下樁各官火者服與庶人同洪武三年諭宰臣內使監未有職名者當



別製冠以別監官禮部奏定內使監凡遇朝會依品具

朝服公服行禮其常服葵花胸背團領衫不拘顏色烏

紗帽犀角帶無品從者常服團領衫無胸背花不拘顏

色烏角帶烏紗帽垂軟帶年十五以下者惟戴烏紗小

頂帽按大政記永樂以後宦官在帝左右必蟒服製如

曳撒繡蟒於左右繫以鷹帶此燕閑之服也次則飛魚

惟入侍用之貴而用事者賜蟒文武一品官所不易得

也單蟒面皆斜向坐蟒則面正向尤貴又有膝襪者亦

如曳撒上有蟒補當膝處橫織細雲蟒蓋南郊及山陵  
扈從便於乘馬也或召對燕見君臣皆不用袍而用此  
第蟒有五爪四爪之分襴有紅黃之別耳弘治元年都  
御史邊鏞言國朝品官無蟒衣之制夫蟒無角無足今  
內官多乞蟒衣殊類龍形非制也乃下詔禁之十七年  
諭閣臣劉健曰內臣僭妄尤多因言服色所宜禁曰蟒  
龍飛魚斗牛本在所禁不合私織間有賜者或久而赦  
不宜輒自織用元黃紫皁乃屬正禁即柳黃明黃蓋黃

諸色亦應禁之孝宗加意鉗束故申飭者再然內官驕恣已久積習相沿不能止也初太祖制內臣服其紗帽與羣臣異且無朝冠幘頭亦無祭服萬厯初穆宗主入太廟大璫冠進賢服祭服以從蓋內府祀中雷竈井之神例遣中官因自創為祭服非由廷議也

侍儀舍人冠服洪武二年禮官議定侍儀舍人導禮依元制展脚幘頭窄袖紫衫塗金束帶皁紋鞞常服烏紗唐帽諸色盤領衫烏角束帶衫不用黃四年中書省議

定侍儀舍人併御史臺知班引禮執事冠進賢冠無梁服絳色衣其蔽膝履襪帶笏與九品同惟不用中單

校尉冠服洪武三年定制執仗之士首飾皆縷金額交脚幘頭其服皆諸色辟邪寶相花裙襖銅葵花束帶皐紋鞞六年令校尉衣只孫束帶幘頭鞞鞵只孫一作質孫本元制蓋一色衣也十四年改用金鵝帽黑漆戲金荔枝銅釘樣每五釘攢就四面稍起邊襪鞞青緊束之二十二年令將軍力士校尉旂軍常戴頭巾或楹腦二

十五年令校尉力士上直穿鞞出外不許

刻期冠服宋置快行親從官明初謂之刻期冠方頂巾  
衣胸背鷹鷄花腰線襖子諸色闊匾絲條大象牙雕花  
環行滕八帶鞞洪武六年惟用雕刻象牙條環餘同庶  
民

儒士生員監生巾服洪武三年令士人戴四方平定巾  
二十三年定儒士生員衣自領至裳去地一寸袖長過  
手復回不及肘三寸二十四年以士子巾服無異吏胥

宜甄別之命工部制式以進太祖親視凡三易乃定生  
員襴衫用玉色布絹為之寬袖阜緣阜條較巾垂帶貢  
舉入監者不變所服洪武末許戴遮陽帽後遂私戴之  
洪熙中帝問衣藍者何人左右以監生對帝曰著青衣  
較好乃易青圓領嘉靖二十二年禮部言士子冠服說  
異有凌雲等巾甚乖禮制詔所司禁之萬曆二年禁舉  
人監生生儒僭用忠靜冠巾錦綺鑲履及張繖蓋戴爇  
耳違者五城御史送問

庶人冠服明初庶人婚許假九品服洪武三年庶人初

戴四帶巾改四方平定巾雜色盤領衣不許用黃又令

男女衣服不得僭用金繡錦綺紵絲綾羅止許紬絹素

紗其鞞不得裁製花樣金線裝飾首飾釵鐲不許用金

玉珠翠止用銀六年令庶人中環不得用金玉瑪瑙珊

瑚琥珀未入流品者同庶人帽不得用頂帽珠止許水

晶香木十四年令農衣紬紗絹布商賈止衣絹布農家

有一人為商賈者亦不得衣紬紗二十二年令農夫戴

斗笠蒲笠出入市井不禁不親農業者不許二十三年  
令耆民衣制袖長過手復回不及肘三寸庶人衣長去  
地五寸袖長過手六寸袖樁廣一尺袖口五寸二十五  
年以民間違禁鞞巧裁花樣嵌以金線藍條詔禮部嚴  
禁庶人不許穿鞞止許穿皮札鞞惟北地苦寒許用牛  
皮直縫鞞正德元年禁商販僕役倡優下賤不許服用  
貂裘十六年禁軍民衣紫花罩甲或禁門或四外遊走  
者緝事人禽之



士庶妻冠服洪武三年定制士庶妻首飾用銀鍍金耳

環用金珠釧鐲用銀服淺色團衫用紵絲綾羅紬絹五

年令民間婦人禮服惟紫絕不用金繡袍衫止紫綠桃

紅及諸淺淡顏色不許用大紅鴉青黃色帶用藍絹布

女子在室者作三小髻金釵珠頭髻窄袖褙子凡婢使

高頂髻絹布狹領長襖長裙小婢使雙髻長袖短衣長

裙成化十年禁官民婦女不得僭用渾金衣服寶石首

飾正德元年令軍民婦女不許用銷金衣服帳幔寶石

首飾錫釧

協律郎樂舞生冠服明初郊社宗廟用雅樂協律郎幘  
頭紫羅袍荔枝帶樂生緋袍展脚幘頭舞士幘頭紅羅  
袍荔枝帶皁鞞文舞生紅袍武舞生緋袍俱展脚幘頭  
革帶皁鞞朝會大樂九奏歌工中華一統巾紅羅生色  
大袖衫畫黃鶯鸚鵡花樣紅生絹襯衫錦領杏紅絹裙  
白絹大口袴青絲條白絹襪茶褐鞵其和聲郎押樂者  
皁羅闊帶巾青羅大袖衫紅生絹襯衫錦領塗金束帶

皐鞞其三舞一武舞曰平定天下之舞舞士皆黃金束  
髮冠紫絲纓青羅生色畫舞鶴花樣窄袖衫白生絹襯  
衫錦領紅羅銷金大袖罩袍紅羅銷金裙皐生色畫花  
緣襖白羅銷金汗袴藍青羅銷金綠紅絹擁項紅結子  
紅絹束腰塗金束帶青絲大條錦臂鞞綠雲頭皐鞞舞  
師黃金束髮冠紫絲纓青羅大袖衫白絹襯衫錦領塗  
金束帶綠雲頭皐鞞一文舞曰車書會同之舞舞士皆  
黑光描金方山冠青絲纓青紅羅大袖衫紅生絹襯衫

錦領紅羅擁項紅結子塗金束帶白絹大口袴白絹襪  
茶褐鞵舞師冠服與舞士同惟大袖衫用青羅不用紅  
羅擁項紅結子一文舞曰撫安四夷之舞舞士東夷四  
人椎髻於後繫紅銷金頭繩紅羅銷金抹額中綴塗金  
博山兩傍綴塗金巾環明金耳環青羅生色畫花大袖  
衫紅生色領袖紅羅銷金裙青銷金裙綠紅生絹襯衫  
錦領塗金束帶烏皮鞵西戎四人間道錦纏頭明金耳  
環紅紵絲細摺襖子大紅羅生色雲肩綠生色綠藍青

羅銷金汗袴紅銷金緣繫腰合鉢十字泥金數珠五色

銷金羅香囊紅絹擁項紅結子赤皮鞞南蠻四人縮朝

天髻繫紅羅生色銀錠紅銷金抹額明金耳環紅織金

短襖子綠織金細摺短裙絨錦袴間道紵絲手巾泥金

頂牌金珠瓔珞綴小金鈴錦行纏泥金獅蠻帶綠銷金

擁項紅結子赤皮鞞北翟四人戴單于冠貂鼠皮簷雙

垂髻紅銷金頭繩紅羅銷金抹額諸色細摺襖子藍青

生色雲肩紅結子紅銷金汗袴繫腰合鉢卑皮鞞其舞

師皆戴白捲簷氈帽塗金帽頂一撒紅纓紫羅帽襪紅  
綠金繡襖子白銷金汗袴藍青銷金綠塗金束帶綠擁  
項紅結子赤皮鞞凡大樂工及文武二舞樂工皆曲脚  
幘頭紅羅生色畫花大袖衫塗金束帶紅絹擁項紅結  
子卑皮鞞四夷樂工皆蓮花帽諸色細摺襖子白銷金  
汗袴紅銷金綠紅綠絹束腰紅羅擁項紅結子花鞞永  
樂間定殿內侑食樂奏平定天下之舞引舞樂工皆青  
羅包中青紅綠玉色羅銷金胸背襖子渾金銅帶紅羅

裕襖雲頭皁鞞青綠羅銷金包脣舞人服色如之奏撫  
安四夷之舞高麗舞四人皆笠子青羅銷金胸背襖子  
銅帶皁鞞琉球舞四人皆棉布花手巾青羅大袖襖子  
銅帶白碾光絹間道踢袴皁皮鞞北番舞四人皆狐帽  
青紅紵絲銷金襖子銅帶伍魯速回回舞四人皆青羅  
帽比里罕棉布花手巾銅帶皁鞞奏車書會同之舞舞  
人皆皁羅頭巾青綠玉色皁沿邊欄茶褐線條皁皮四  
縫鞞奏表正萬邦之舞引舞二人青羅包巾紅羅銷金

項帕紅生絹錦領中單紅生絹銷金通袖襖子青線條  
銅帶織錦臂鞞雲頭皁鞞各色銷金包脣紅絹袴襦舞  
人樂工服色與引舞同奏天命有德之舞引舞二人青  
幪紗如意冠紅生絹錦領中單紅生絹大袖袍各色絹  
采畫直纏黑角偏帶藍絹綵雲頭皁鞞白布襪舞人樂  
工服色與引舞同洪武五年定齋郎樂生文武舞生冠  
服齋郎黑介幘漆布為之無花樣服紅絹窄袖衫紅生  
絹為裏皁皮四縫鞞黑角帶文舞生及樂生黑介幘漆



布為之上加描金蟬服紅絹大袖袍胸背畫纏枝方葵  
花紅生絹為裏加錦臂鞵二皂皮四縫鞵黑角帶武舞  
生武弁以漆布為之上加描金蟬服飾鞵帶並同文舞  
生嘉靖九年定文武舞生服制園丘服青紵絲方澤服  
黑綠紗朝日壇服赤羅夕月壇服玉色羅

宮中女樂冠服洪武三年定制凡中宮供奉女樂奉鑿  
等官妻本色髻髻青羅圓領提調女樂黑漆唐巾大紅  
羅銷金花圓領鍍金花帶皂鞵歌章女樂黑漆唐巾大

紅羅銷金裙襖胸帶大紅羅抹額青綠羅彩畫雲肩描  
金牡丹花阜鞞奏樂女樂服色與歌章同嘉靖九年祀  
先蠶定樂女生冠服黑縐紗描金蟬冠黑絲纓黑素羅  
銷金葵花胸背大袖女袍黑生絹襯衫錦領塗金束帶  
白襪黑鞵

教坊司冠服洪武三年定教坊司樂藝青卍字頂巾繫  
紅綠褶襖樂妓明角冠阜褶子不許與民妻同御前供  
奉俳長鼓吹冠紅羅胸背小袖袍紅絹褶襖阜鞞色長

鼓吹冠紅青羅紵絲彩畫百花袍紅絹褙襖歌工弁冠

紅羅織金胸背大袖袍紅生絹錦領中單黑角帶紅熟

絹錦脚袴皁皮琴鞵白棉布夾襪樂工服色與歌工同

凡教坊司官常服冠帶與百官同至御前供奉執粉漆

笏服黑漆幘頭黑綠羅大袖襪袍黑角偏帶皁鞵教坊

司伶人常服綠色中以別士庶之服樂人皆戴鼓吹冠

不用錦條惟紅褙襖服色不拘紅綠教坊司婦人不許

戴冠穿袴于樂人衣服止用明綠桃紅玉色水紅茶褐

色俳優色長樂工俱阜頭巾雜色條

王府樂工冠服洪武十五年定凡朝賀用大樂宴禮七  
奏樂樂工俱紅絹彩畫胸背方花小袖單袍有花鼓吹  
冠錦臂鞬阜鞞抹額以紅羅彩畫束腰以紅絹其餘樂  
工用綠絹彩畫胸背方花小袖單袍無花鼓吹冠抹額  
以紅絹彩畫束腰以紅絹

軍士服洪武元年令製衣表裏異色謂之鴛鴦戰襖以  
新軍號二十一年定旂手衛軍士力士俱紅絆襖其餘

衛所祥襖如之凡祥襖長齊膝窄袖內實以棉花二十六年令騎士服對襟衣便於乘馬也不應服而服者罪之

皐隸公人冠服洪武三年定皐隸圓頂巾皐衣四年定皐隸公使人皐盤領衫平頂巾白襦襖帶錫牌十四年令各衙門祇禁原服皐衣改用淡青二十五年皐隸伴當不許著鞞止用皮札鞞

外國君臣冠服洪武二年高麗入朝請祭服制度命製

給之二十七年定蕃國朝貢儀國王來朝如嘗賜朝服者服之以朝三十一年賜琉球國王併其臣下冠服永樂中賜琉球中山王皮弁玉圭麟袍犀帶視二品秩宣德三年朝鮮國王李禔言洪武中蒙賜國王冕服九章陪臣冠服比朝廷遞降二等故陪臣一等比朝臣第三等得五梁冠服永樂初先臣芳遠遣世子楸入朝蒙賜五梁冠服臣竊惟世子冠服何止同陪臣一等乞為定制乃命製六梁冠賜之嘉靖六年令外國朝貢人不許

擅用違制衣服如違賣者買者同罪

僧道服洪武十四年定禪僧茶褐常服青條玉色袈裟  
講僧玉色常服綠條淺紅袈裟教僧阜常服黑條淺紅  
袈裟僧官如之惟僧錄司官袈裟綠文及環皆飾以金  
道士常服青法服朝衣皆赤道官亦如之惟道錄司官  
法服朝服綠文飾金凡在京道官紅道衣金襴木簡在  
外道官紅道衣木簡不用金襴道士青道服木簡

明史卷六十七

欽定四庫全書書要卷六千六百六十一

史部

明史卷六十八

大學士張廷玉等奉 敕修

志第四十四

輿服四

皇帝寶璽

皇后冊寶

皇妃以下冊印

皇太子冊寶

皇太子妃冊寶

親王以下冊寶冊印



鐵券

印信

符節

宮室制度

臣庶室屋制度

器用

明初寶璽十七其大者曰皇帝奉天之寶曰皇帝之寶  
曰皇帝行寶曰皇帝信寶曰天子之寶曰天子行寶曰  
天子信寶曰制誥之寶曰敕命之寶曰廣運之寶曰皇  
帝尊親之寶曰皇帝親親之寶曰敬天勤民之寶又有  
御前之寶表章經史之寶及欽文之璽丹符出驗四方

洪武元年欲制寶璽有賈胡浮海獻美玉曰此出于閩  
祖父相傳當為帝王寶璽乃命製為寶不知十七寶中  
此玉製何寶也成祖又製皇帝親親之寶皇帝奉天之  
寶誥命之寶敕命之寶弘治十三年鄆縣民毛志學於  
泥河濱得玉璽其文曰受命於天既壽永昌色白微青  
螭鈕陝西巡撫熊翀以為秦璽復出遣人獻之禮部尚  
書傅瀚言自有秦璽以來歷代得喪真偽之跡具載史  
籍今所進篆文與輟耕錄等書摹載魚鳥篆文不同其

螭紐又與史傳所紀文盤五龍螭缺一角旁刻魏錄者

不類蓋秦璽亾已久今所進與宋元所得疑皆後世摹

秦璽而刻之者竊惟璽之用以識文書防詐偽非以為

寶玩也自秦始皇得藍田玉以為璽漢以後傳用之自

是巧爭力取謂得此乃足以受命而不知受命以德不

以璽也故求之不得則偽造以欺人得之則君臣色喜

以誇示於天下是皆貽笑千載我高皇帝自制一代之

璽文各有義隨事而施真足以為一代受命之符而垂

法萬世何藉此璽哉帝從其言却而不用嘉靖十八年  
新製七寶曰奉天承運大明天子寶大明受命之寶巡  
狩天下之寶垂訓之寶命德之寶討罪安民之寶敕正  
萬民之寶與國初寶璽共為御寶二十四尚寶司官掌  
之

皇后之冊用金冊二片依周尺長一尺二寸廣五寸厚  
二分五釐字依數分行鑄以真書上下有孔聯以紅絲  
開闔如書帙藉以紅錦褥冊蓋用木飾以渾金漉粉蟠

龍紅紵絲襯裏內以紅羅銷金小袂裏冊外以紅羅銷  
金夾袂包之五色小包縈于外寶用金龜紐篆文曰皇  
后之寶依周尺方五寸九分厚一寸七分寶池用金闊  
取容寶篋二副一置寶一置寶池每副三重外篋用木  
飾以渾金漉粉蟠龍紅紵絲襯裏中篋用金釵蟠龍內  
小篋飾如外篋內置寶座四角雕蟠龍飾以渾金座上  
用錦褥以銷金紅羅小夾袂裏寶其篋外各用紅羅銷  
金大夾袂覆之臨冊之日冊寶俱置於紅髹與案案頂

有紅羅漉水用擔杖舉之

皇貴妃而下有冊無寶而有印妃冊用鍍金銀冊二片  
廣長與后冊同冊蓋飾以渾金漉粉蟠龍其印用金龜  
紐尺寸與諸王寶同文曰皇妃之印篋飾以蟠鳳宣德  
元年帝以貴妃孫氏有容德特請於皇太后製金寶賜  
之未幾即誕皇嗣自是貴妃投寶遂為故事嘉靖十年  
立九嬪冊用銀殺皇妃五分之一以金飾之

皇太子冊寶冊用金二片其制及蓋篋之飾與皇后冊

同寶用金龜紐篆書皇太子寶其制及池篋之飾與后寶同

皇太子妃冊寶其冊用金兩葉重百兩每葉高一尺二寸廣五寸藉冊以錦聯冊以紅絲條墊冊以錦褥裏冊以紅羅銷金袂其蓋飾以渾金澁粉雲鳳內有花銀釘較嵌金絲鐵筥籥外以紅羅銷金袂覆之其金寶之制未詳洪武二十八年更定止授金冊不用寶

親王冊寶冊制與皇太子同其寶用金龜紐依周尺方

五寸二分厚一寸五分文曰某王之寶池篋之飾與皇太子寶同寶蓋之飾則雕螭

親王妃冊印其金冊高視太子妃冊減一寸餘制悉同冊文視親王其金印之制未詳洪武二十八年更定止授金冊

公主冊印銀冊二片鐫字鍍金藉以紅錦褥冊蓋飾以渾金漉粉螭螭其印同宋制用金龜紐文曰某國公主之印方五寸二分厚一寸五分印池用金廣取容印外



篋用木飾以渾金澁粉蟠鳳中篋用金鈹蟠鳳內小篋飾如外篋

親王世子金冊金寶承襲止授金冊傳用金寶

世子妃亦用金冊洪武二十三年鑄世子妃印制視王妃金印龜紐篆文曰某世子妃印

郡王鍍金銀冊鍍金銀印冊文視世子其妃止有鍍金銀冊

功臣鐵券洪武二年太祖欲封功臣議為鐵券而未有

定制或言台州民錢允一有家藏吳越王鏐唐賜鐵券  
遂遣使取之因其式而損益焉其制如瓦第為七等公  
二等一高尺廣一尺六寸五分一高九寸五分廣一尺  
六寸侯三等一高九寸廣一尺五寸五分一高八寸五  
分廣一尺五寸一高八寸廣一尺四寸五分伯二等一  
高七寸五分廣一尺三寸五分一高六寸五分廣一尺  
二寸五分外刻厯履恩數之詳以記其功中鐫免罪減  
祿之數以防其過字嵌以金凡九十七副各分左右左

頒功臣右藏內府有故則合之以取信焉三年大封公

臣公六人侯二十八人並賜鐵券公李善長徐達李文

忠馮勝鄧愈常茂侯湯和唐勝宗陸仲亨周德興華雲

龍顧時耿炳文陳德郭子興王志鄭遇春費聚吳良吳

楨趙庸廖永忠俞通源華高楊璟康鐸朱亮祖傅友德

胡美韓政黃彬曹良臣梅思祖陸聚二十五年改製鐵

券賜公傅友德侯王弼耿炳文郭英及故公徐達李文

忠侯吳傑沐英凡八家永樂初靖難功臣亦有賜者

百官印信洪武初鑄印局鑄中外諸司印信正一品銀印三臺方三寸四分厚一寸六部都察院並在外各都司俱正二品銀印二臺方三寸二分厚八分其餘正二品從二品官銀印二臺方三寸一分厚七分惟衍聖公以正二品三臺銀印則景泰三年賜也順天應天二府俱正三品銀印方二寸九分厚六分五釐其餘正三品從三品官俱銅印方二寸七分厚六分惟太僕光祿寺並在外鹽運司俱從三品銅印方減一分厚減五釐正

四品從四品俱銅印方二寸五分厚五分正五品從五  
品俱銅印方二寸四分厚四分五釐惟在外各州從五  
品銅印方減一分厚減五釐正六品從六品俱銅印方  
二寸二分厚三分五釐正七品從七品銅印方二寸一  
分厚三分正從八品俱銅印方二寸厚二分五釐正從  
九品俱銅印方一寸九分厚二分二釐未入流者銅條  
記闊一寸三分長二寸五分厚二分一釐以上俱直紐  
九疊篆文初雜職亦方印至洪武十三年始改條記凡

百官之印惟文淵閣銀印直紐方一寸七分厚六分玉  
箸篆文誠重之也武臣受重寄者征西鎮朔平蠻諸將  
軍銀印虎紐方三寸三分厚九分柳葉篆文洪武中嘗  
用上公佩將軍印後以公侯伯及都督充總兵官名曰  
掛印將軍有事征伐則命總兵佩印以往旋師則上所  
佩印於朝此外惟漕運總兵印同將軍其在外鎮守總  
兵參將掛印則洪武元年始也有文臣掛將軍印者王  
驥以兵部尚書征湖貴苗掛征蠻將軍印王越以左都

御史守大同掛征西將軍印其他文武大臣有領敕而  
權重者或給以銅關防直紐廣一寸九分五釐長二寸  
九分厚三分九釐篆文雖宰相行邊與部曹無異惟正  
德時張永征安化王用金鑄嘉靖中顧鼎臣居守用牙  
鏤關防皆特賜也初太祖重御史之職分河南等十三  
道每道鑄二印文曰繩愆糾繆守院御史掌其一其一  
藏內府有事則受以出復命則納之洪武二十三年都  
御史素秦言各道印篆相類乃命改製某道監察御史

其奉差者則曰巡按某處監察御史銅印直紐有眼方一寸五分厚三分八疊篆文成祖初幸北京有一官署二三印者夏原吉至兼掌九卿印諸曹並於朝房取裁其任重矣

明初賜高麗金印龜紐方三寸文曰高麗國王之印賜安南鍍金銀印駝紐方三寸文曰安南國王之印賜占城鍍金銀印駝紐方三寸文曰占城國王之印賜土蕃金印駝紐方五寸文曰白蘭王印



符牌凡宣召親王必遣官齎金符以往親王之藩及鎮守巡撫諸官奏請符驗俱從兵部奏行尚寶司領之洪武二十六年定制凡公差以軍情重務及奉旨差遣給驛者兵部既給勘合即赴內府關領符驗給驛而去事竣則繳嘉靖三十七年定制南京鳳陽守備內外官並各處鎮守總兵巡撫及各守一方不受鎮守節制內外守備並領符驗奏事凡監鎗整飭兵備並一城一堡守備官不許關領符驗其制上織船馬之狀起馬者用馬

字號起船者水字號起雙馬者達字號起單馬者通字  
號起站船者信字號洪武四年始製用寶金牌凡軍機  
文書自都督府中書省長官而外不許擅奏有詔調軍  
中書省同都督府覆奏乃各出所藏金牌入請用寶又  
造軍中調發符牌用鐵長五寸濶半之上釵二飛龍下  
釵二麒麟首為圍竅貫以紅絲條嘗遣官齎金牌信符  
詣西番以茶易馬其牌四十一上號藏內府下號降各  
番篆文曰皇帝聖旨左曰合當差發右曰不信者斬二

十二年又頒西番金牌信符其後番官款塞皆齎原降  
牌符而至永樂二年製信符金字紅牌給雲南諸蠻凡  
歷代改元則所頒外國信符金牌必更鑄新年號給之  
此符信之達於四裔者也其武臣懸帶金牌則洪武四  
年所造闊二寸長一尺上鈿雙龍下鈿二伏虎牌首尾  
為圓竅貫以紅絲條指揮佩金牌雙雲龍雙虎符千戶  
佩鍍金銀牌獨雲龍獨虎符百戶素雲銀牌符太祖親  
為文鈿之曰上天祐民朕乃率撫威加華夏實憑虎臣

賜爾金符永傳後嗣天子祀郊廟若視學藉田勲衛扈  
從及公侯駙馬五府都督日直錦衣衛當直及都督率  
諸衛千百戶夜巡內皇城金吾諸衛各輪官隨朝巡綽  
俱給金牌有龍者虎者麒麟者獅者雲者以官為差其  
扈駕金字銀牌則洪武六年所造尋改為守衛金牌以  
銅為之塗以金高一尺闊三寸分字號凡五仁字號上  
釵獨龍螭雲花公侯伯都督佩之義字號釵伏虎盤雲  
花指揮佩之禮字號釵獬豸螭雲花千戶衛鎮撫佩之

智字號釵獅子蟠雲花百戶所鎮撫佩之信字號釵蟠  
雲花將軍佩之牌下鑄守衛二篆字背鑄凡守衛官軍  
懸帶此牌等二十四字牌首竅貫青絲鎮撫及將軍隨  
駕直宿衛者佩之下直則納之凡夜巡官於尚寶司領  
令牌禁城各門金吾等衛指揮千戶分領申字號牌午  
門自一至四長安左右門東華門自五至八西華門自  
九至十二元武門自十三至十六五城兵馬指揮亦日  
領令牌東西南北中城分領木金水火土五字號留守

五衛巡城官並金吾等衛守衛官俱領銅符留守衛指揮所領承字及東西北字號牌俱左半字陽文左比金吾等衛端門承天門東西北安門指揮千戶所領承字及東西北字號俱右半字陰文右比銅符字號比對相同方許巡行內官內使之出亦須守門官比對銅符而後行皇城九門守衛軍與圍子手各領勇字號銅牌錦衣校尉上直及光祿寺吏典厨役遇大祀俱佩雙魚銅牌永樂六年駕幸北京扈從官俱帶牙牌五府六部都

察院大理寺錦衣衛各鑄印信通政司鴻臚寺各鑄關防謂之行在衙門印信關防其後命內府印綬監收貯嘉靖十八年南巡禮部領出以給扈從者焉凡郊廟諸祭陪祀供事官及執事者入壇俱領牙牌洪武八年始也圓花牌陪祀官領之長花牌供事官領之長素牌執事人領之又謂之祀牌凡駕詣陵寢扈從官俱於尚寶司領小牙牌嘉靖九年皇后行親蠶禮文官四品以上武官三品以上命婦及使人俱於上寶司領牙牌有雲

花圓牌鳥形長牌之異凡文武朝參官錦衣衛當駕官亦領牙牌以防姦偽洪武十一年始也其制以象牙為之刻官職於上不佩則門者却之私相借者論如律牙牌字號公侯伯以勳字駙馬都尉以親字文官以文字武官以武字教坊官以樂字入內官以官字正德十六年禮科邢寰言牙牌惟常朝職官得懸比來權姦侵柄傳旨陞官者輒佩牙牌宜清核以重名器乃命文職不朝參者毋得濫給牙牌武官進御侍班佩刀執金爐者



給與嘉靖二十八年內府供事匠作武職官皆帶朝參

牙牌嘗奉旨革奪旋復給之給事中陳邦修以為言禮

部覆奏會典所載文武官出入禁門帶牙牌有執事供

事朝參之別執事供事者皆屆期而領如期而繳惟朝

參牙牌得朝夕懸之非徒為關防之具亦以示等威之

辨也虛銜帶俸供事執事者不宜槩領第出入禁闥若

一切革奪何由譏察尚寶司所貯舊牌數百上有入內

府字號請以給之至於衛所武官掌印僉書侍衛之外

非屬朝參供役者盡革奪之其納粟填註冒賜牙牌及  
罷退閑住官舊所關領不繳者俱逮問報可

洪武十五年製使節黃色三簷寶蓋長二尺黃紗袋籠  
之又製丹漆架一以節置其上使者受命則戴以行使  
歸則持之以復命二十三年詔考定使節之制禮部奏  
漢光武時以竹為節柄長八尺其毛三重而黃公紹韻  
會註漢節柄長三尺毛三重以旄牛為之詔從三尺之

制

宮室之制吳元年作新內正殿曰奉天殿後曰華蓋殿  
又後曰謹身殿皆翼以廊廡奉天殿之前曰奉天門殿  
左曰文樓右曰武樓謹身殿之後為宮前曰乾清後曰  
坤寧六宮以次列宮殿之外周以皇城城之門南曰午  
門東曰東華西曰西華北曰元武時有言瑞州文石可  
甃地者太祖曰敦崇儉朴猶恐習於奢華爾乃導子奢  
麗乎言者慚而退洪武八年改建大內宮殿十年告成  
闕門曰午門翼以兩觀中三門東西為左右掖門午門

內曰奉天門門內奉天殿嘗御以受朝賀者也門左右  
為東西角門奉天殿左右門左曰中左右曰中右兩廡  
之間左曰文樓右曰武樓奉天殿之後曰華蓋殿華蓋  
殿之後曰謹身殿殿後則乾清宮之正門也奉天門外  
兩廡間有門左曰左順右曰右順左順門外有殿曰文  
華為東宮視事之所右順門外有殿曰武英為皇帝齋  
戒時所居制度如舊規模益宏二十五年改建大內金  
水橋又建端門承天門樓各五間及長安東西二門永

樂十五年作西宮於北京中為奉天殿側為左右二殿  
南為奉天門左右為東西角門其南為午門又南為承  
天門殿北有後殿涼殿暖殿及仁壽景福仁和萬春永  
壽長春等宮凡為屋千六百三十餘楹十八年建北京  
凡宮殿門闕規制悉如南京壯麗過之中朝曰奉天殿  
通為屋八千三百五十楹殿左曰中左門右曰中右門  
丹墀東曰文樓西曰武樓南曰奉天門常朝所御也左  
曰東角門右曰西角門東廡曰左順門西廡曰右順門

正南曰午門中三門翼以兩觀觀各有樓左曰左掖門  
右曰右掖門午門左稍南曰闕左門曰神厨門內為太  
廟右稍南曰闕右門曰社左門內為太社稷又正南曰  
端門東曰廟街門即太廟右門也西曰社街門即太社  
稷壇南左門也又正南曰承天門又折而東曰長安左  
門折而西曰長安右門東後曰東安門西後曰西安門  
北後曰北安門正南曰大明門中為馳道東西長廊各  
千步奉天殿之後曰華蓋殿又後曰謹身殿謹身殿左

曰後左門右曰後右門正北曰乾清門內為乾清宮是  
曰正寢後曰交泰殿又後曰坤寧宮為中宮所居東曰  
仁壽宮西曰清寧宮以奉太后左順門之東曰文華殿  
右順門之西曰武英殿文華殿東南曰東華門武英殿  
西南曰西華門坤寧宮後曰坤寧門門之後曰元武門  
其他宮殿名號繁多不能盡列所謂千門萬戶也皇城  
內宮城外凡十有二門曰東上門東上北門東上南門  
東中門西上門西上北門西上南門西中門北上門北

上東門北上西門北中門復於皇城東南建皇太孫宮  
東安門外東南建十王街宣宗留意文雅建廣寒清暑  
二殿及東西瓊島游觀所至悉置經籍正統六年重建  
三殿嘉靖中於清寧宮後地建慈慶宮於仁壽宮故基  
建慈寧宮三十六年三殿門樓災帝以殿名奉天非題  
扁所宜用敕禮部議之部臣會議言皇祖肇造之初名  
曰奉天者昭揭以示虔爾既以名則是昊天監臨儼然  
在上臨御之際坐以視朝似未安也今乃修復之始宜



更定以答天庥明年重建奉天門更名曰大朝門四十一年更名奉天殿曰皇極華蓋殿曰中極謹身殿曰建極文樓曰文昭閣武樓曰武成閣左順門曰會極右順門曰歸極大朝門曰皇極東角門曰宏政西角門曰宣治又改乾清宮右小閣名曰道心旁左門曰仁蕩右門曰義平世宗初墾西苑隙地為田建殿曰無逸亭曰幽風又建亭曰省耕曰省斂每歲耕穫帝輒臨觀十三年西苑河東亭榭成親定名曰天鵝房北曰飛靄亭迎翠

殿前曰浮香亭寶月亭前曰秋輝亭昭和殿前曰澄淵亭後曰趨臺坡臨漪亭前曰水雲榭西苑門外二亭曰左臨海亭右臨海亭北閘口曰湧玉亭河之東曰聚景亭改呂梁洪之亭曰呂梁前曰儀金亭翠玉館前曰擷秀亭

親王府制洪武四年定城高二丈九尺正殿基高六尺九寸正門前後殿四門城樓飾以青綠點金廊房飾以青黛四城正門以丹漆金塗銅釘宮殿窠拱攢頂中畫

蟠螭飾以金邊畫八吉祥花前後殿座用紅漆金蟠螭  
帳用紅銷金蟠螭座後壁則畫蟠螭彩雲後改為龍立  
山川社稷宗廟於王城內七年定親王所居殿前曰承  
運中曰園殿後曰存心四城門南曰端禮北曰廣智東  
曰體仁西曰遵義太祖曰使諸王親名思義以藩屏帝  
室九年定親王宮殿門廡及城門樓皆覆以青色琉璃  
瓦又命中書省臣惟親王宮得飾朱紅大青綠其他居  
室止飾丹碧十二年諸王府告成其制中曰承運殿十

一間後為圍殿次曰存心殿各九間承運殿兩廡為左  
右二殿自存心承運周迴兩廡至承運門為屋百三十  
八間殿後為前中後三宮各九間宮門兩廂等室九十  
九間王城之外周垣四門堂庫等室在其間凡為宮殿  
室屋八百間有奇弘治八年更定王府之制頗有所增  
損郡王府制天順四年定門樓廳廂厨庫米倉等共數  
十間而已

公主府第洪武五年禮部言唐宋公主視正一品府第

並用正一品制度今擬公主第廳堂九間十一架施花樣獸脊梁棟斗拱簷桷彩色繪飾惟不用金正門五間七架大門綠油銅環石礎牆甃錫鑿玲瓏花樣從之

百官第宅明初禁官民房屋不許雕刻古帝后聖賢人物及日月龍鳳狻猊麒麟犀象之形凡官員任滿致仕與見任同其父祖有官身歿子孫許居父祖房舍洪武二十六年定制官員營造房屋不許歇山轉角重簷重拱及繪藻井惟樓居重簷不禁公侯前廳七間兩廡九

架中堂七間九架後堂七間七架門三間五架用金漆  
及獸面錫環家廟三間五架覆以黑板瓦脊用花樣瓦  
獸梁棟斗拱簷桷綵繪飾門窗枋柱金漆飾廊廡庖庫  
從屋不得過五間七架一品二品廳堂五間九架屋脊  
用瓦獸梁棟斗拱簷桷青碧繪飾門三間五架綠油獸  
面錫環三品至五品廳堂五間七架屋脊用瓦獸梁棟  
簷桷青碧繪飾門三間三架黑油錫環六品至九品廳  
堂三間七架梁棟飾以土黃門一間三架黑門鐵環品

官房舍門窗戶牖不得用丹漆功臣宅舍之後留空地  
十丈左右皆五丈不許那移軍民居止更不許於宅前  
後左右多占地構亭館開池塘以資遊眺三十五年申  
明禁制一品三品廳堂各七間六品至九品廳堂梁棟  
祇用粉青飾之

庶民廬舍洪武二十六年定制不過三間五架不許用  
斗拱飾彩色三十五年復申禁飭不許造九五間數房  
屋雖至一二十所隨其物力但不許過三間正統十二

年令稍變通之庶民房屋架多而間少者不在禁限

器用之禁洪武二十六年定公侯一品二品酒注酒盞  
金餘用銀三品至五品酒注銀酒盞金六品至九品酒  
注酒盞銀餘皆菟漆木器不許用硃紅及抹金描金雕  
琢龍鳳文庶民酒注錫酒盞銀餘用菟漆百官牀面屏  
風榻子雜色漆飾不許雕刻龍文並金飾朱漆軍官軍  
士弓矢黑漆弓袋箭囊不許用朱漆描金裝飾建文四  
年申飭官民不許僭用金酒爵其椅棹木器亦不許朱



紅金飾正德十六年定一品二品器皿不用玉止許用  
金商賈技藝家器皿不許用銀餘與庶民同



明史卷六十八



總校官編修臣吳紹濂